

ABU ABDO ALBAGL

جلیلة بكار

# جنون



SCANNED BY  
JAMAL HATMAL



المسرح الحي



جنون



جليلة بكّار

# جنون

عن

«يوميات خطاب فصامي»

لناجية الزمني

يمنع حسب القانون استنساخ أي جزء من الكتاب  
والإتجار به.  
يحتفظ الناشر بحقه في القيام لدى القضاء  
(قانون عدد 36-94 بتاريخ 24/2/94)

© — 2001 جميع الحقوق محفوظة لدار الجنوب للنشر

79، نهج فلسطين. 1002 تونس

e.mail : sud.edition@planet.tn

ISBN : 9973-844-05-x



# جنون

## أو شعرية خطاب احتجاجي عاشق

عندما نفكر في النص المسرحي الذي يقوم عليه عرض "جنون" للفاضل الجعايي يستعجز الانطباع عندنا بأن هذا النص الذي ندركه كمقول على أفواه الممثلين ليس إلا مجرد شذرات سرديّة ميوّبة وحوارات موضّحة تقوم مقام التقييدات التوجيهيّة لنشأة هذا العرض وسيورته. وكأنّ هذا النص المسرحي ليس إلا ذلك القرين التابع لعملية التوليف الإخراجي الذي يستعطف فيه المقول صورته الدالة وترجمته المشهديّة ويستجدي فيه أسباب حياته بعد أن كان مجرد رسم على ورق... ننجذب إلى هذا الانطباع ونكاد نسلم بأنّ النص المسرحي على الأقل في تجربة الفاضل الجعايي المسرحيّة ليس إلا ذلك العنصر الدراماتيوريّ التابع لما تفضي إليه مغامرة الإبداع في مخاضها الأخير حين تكتمل ولادة العرض وتتجلّى ماثلة أمام أعيننا بهالتها البصريّة وطاقتها التعبيريّة.

غير أنّ هذا التسليم المطمئن لتبعية النص المسرحي للعرض قد انقشع أوّل مرّة حين نشر نصّ "فاميليا" كنصّ مسرحيّ مستقلّ قائم بذاته، مجدّداً مسيرة العمل المسرحيّ وحاضناً لمدار رحلته نحو قراءة ممكنة، تدفع بالتفكير الجدّي إلى ضرورة إعادة النظر في مفهومنا للنصّ المسرحيّ ووظيفته التأويليّة والاقتراحيّة خارج ذلك الفهم التقليدي للمدونة المسرحيّة المستقرّة في توابيت قداستها.

لقد كانت تجلّيات مثل هذه النصوص المسرحيّة بعد مرورها على محكّ الممارسة الركحيّة تؤكّد على تأسيسها لعلاقة جدليّة جديدة تتجاوز أسبقية النصّ على العرض أو العكس وتفتح مساراً جديداً تبحث فيه عن متلقّ يتحد فيه القارئ بالمشاهد ويظلّ النصّ المسرحيّ في كلّ ذلك تلك المفارقة المشتركة التي تنتظر سيرة إبداعية جديدة.

لكين وبظهور النص المسرحي "جنون" هذه المرة كاملاً بين دفتي هذا الكتاب فإنّ المغامرة أضحت أكثر جرأة وباتت على قدم المساواة مع تجربة الجعائبي الإخراجية وهي التجربة التي لا تني تكسّر أفق انتظاراتنا شاقّة لنفسها طرقاً وعرة من أجل أسئلة أكثر توهّجاً وأكثر امتحاناً لمسلّماتنا.

فظهور هذا النص المسرحي جزء من استراتيجية يريدتها مسرح "فاميليا" لتأكيد ديناميكية الفعل المسرحي خارج الزمن الموضوعي لتاريخ الفرجة وظروفها الضيقة وخارج طبيعة العرض الزائلة والمنفلتة. وهو أيضاً جزء من ذلك الشغف اللامتناهي الذي تعبّر فيه هذه المرأة جليلاً بكار كاتبة النص على أنّ مكابدة البحث تظلّ استعداداً سابقاً ولا مشروطاً للمقولات الجاهزة ووعياً عصياً لا تكاد أسئلته تنتهي حتى تبدأ في شكل تمرين "توليدي" ينضح بالرؤى ويفيض بالصّور الشعريّة البكر. وقد لمسنا ذلك حين أقدمت جليلاً على كتابة نصّ "البحث عن عائدة" تلك المونودراما الفريدة التي كشفت عن أسلوب دراماتورجيّ بليغ رغم إبحازه وسلس رغم امتناعه... ولأنّ جليلاً بكار تتحدّر من "مدرسة" مسرحية لا تكرر نفسها ولا تكرّس أحاديّة خطاب مسرحيّ مقولب فإنّ كتابتها هذه المرأة لنصّ "جنون" جاءت مغايرة ومخالفة من خلال تلك القدرة التركيبية التي جمعت بين تعدّد الأصوات في السّياق الواحد وبين المراوحة الأنيقة والتنويع في المادّة الدرامية وخامتها السردية والشّعريّة، خاصة وأنّ هذا النصّ المسرحيّ جاء وليد قراءة تحويليّة لنصّ آخر سابق ومتردّد بدوره بين الكتابة التقريرية الطّيبة من جهة وبين كتابة اليوميات وجنس السرد الرّوائي من جهة أخرى، وهو نصّ "يوميات خطاب فصامي" لناجية الزّمني المكتوب بالفرنسية.

وعلى ضوء هذا الاختيار الشاق الذي بدأ بالقراءة أوّلاً كمكابدة ذاتية ثم كفعل مشاركة جدليّة وجدليّة مع عالم "الآخر" فإنّ ما قامت به جليلاً بكار ليس مجرد اقتباس لنصّ آخر بل مراهنّة محفوفة بالمخاطر عبّرت عنه بالإقامة المستمرة في دائرة "تأويل التّأويل" وهو ما ضمن لنصّ

"جنون" طاقته الإنشائية وشاعريته الدرامية العالية النابعة من مخزون كاتبته الوجداني ومن ذائقها الناضجة على إيقاع المسيرة والتجربة الفنية المثقلة من "المسرح الجديد" إلى "فاميليا". ولأن جليلة بكار أيضا -الممثلة والكاتبة- تتحدّر بدورها من ذلك الجيل المتفرد جيل "آخر حلقات الطوبوايين" فإنّ حماسها للانطلاق من نصّ ناجية الزماني قريبتها الجليّة، لا يخفي عنها متطلّبات التحوّل من المادّة الأدبيّة الثابتة للنصّ الأصلي إلي خصوصيّة المادّة الدراميّة المتحرّكة والتي تستوجب جهدا انتقائيا وقدرة اختزاليّة لا يفقهها إلا من خبر أسرار الخشبة ومتطلّباتها وعاشر لغة الفرجة المسرحيّة المعتمدة على ضلال الإشارة وبلاغة الأداء. لذلك كان جهد كتابة نصّ "جنون" مضعفاً ومتعدداً في حجم كلّ تلك العقبات التي يقيّمها نصّ المنطلق الأصلي، وفي حجم الرّهانات التي ناشدها المشروع المسرحي في إبلاغ الجوهر في الخرافة وتحاشي كلّ ما هو ثانوي واستطراديّ وكلّ ما لا حاجة لطبيعة الخطاب الدرامي ولمتطلّباته به.

تقودنا جليلة بكار في فضاء هذا النصّ إلى مكاشفة عالم الجنون والانحراف النفسيّ بعيداً عن إعادة إنتاج الأحكام المسبّقة والصّور المألوفة والمعاني المستهلكة من خلال علاقة طبيية نفسيّة بمریضها الفصامي "نون" لتصف لنا تلاوين تلك الرّحلة العلاجيّة في شكل مغامرة نزول إلى قاع عالم سفليّ متراصّ المحطّات. مغامرة استغرقت أعواماً طويلة يكتفها النصّ ويعيد تركيبها وهي المغامرة التي انطلقت من اصطدام هذه الطّبيبة النفسيّة بالمؤسّسة الصحيّة ورفضها المبدئيّ لأساليبها القاسية في معالجة الانحراف النفسيّ وإصرارها على اتباع أسلوب علاجيّ أكثر إنصافاً وفهماً لأصوات المريض الخفيّة وأكثر اجتهاداً في فهم الأسباب الأصليّة الكامنة وراء انكساره النفسيّ والروحيّ. وذلك بالعودة إلى تقليب التربة التي نشأ فيها المريض "نون" أي بالعودة إلى معاناة العائلة والسير في متاهة المعوقات التي أنتجت هذا المريض. وهي متاهة مأهولة بالنماذج السلبيّة المنكسرة تحت طائلة الحرمان والفقر والجهل والعنف. وهو

الحجيم الذي يتنفس "نون" هواءه الفاسد... عالم كابوسيّ تقودنا إليه الكتابة تؤثته جوقة من الشخصيات المعطوبة والمهمشة تجد مرجعيتها في حياتنا اليومية وفي ملامح ميثولوجيتها المهمشة والمسكوت عنها. شخصيات مقموعة ومُصادرٌ حقّها في العيش وفي الكلام : أب قانع حاضر بالغياب، أم غريزية قاسية وحرون، أخ مستبدّ، أخوات بين الانحراف الأخلاقي والذهني و"نون" في كلّ ذلك مشرحة لكلّ هذه العذابات. التقط النص لحظات صحوه في غمرة انكساره الهذيانى وشكاويه الفصيحة وأطلّ على مدارات قيامته "كقدّيس" معدم، من خلال ذلك الصّوت الثاقب الذي يحمل هذه المغامرة على جناح المهمة ولسان الاحتجاج.

إنّ جلييلة بكار وهي تكتب نصّ "جنون" قد عوّلت على إدراكها التأويلي في محاصرة واستنباط نواة الشيء القابل للعرض والكامنة في نصّ ناجية الزمّني لحظة قراءته. وهو ما ندرکه نحن بدورنا حين نعود الآن لنصّ "جنون" في تمثل الكتابة للمفارقات التي عليها الشخصيات وتلونات أصواتها ونبراتها بدءاً بصوت ناجية الزمّني نفسها المختبئة وراء صوت المرأة والكتابة والطبيرة النفسية والساردة ووصولاً إلى أخفت صوت في الشخصيات المحيطة بـ"نون" وهو ما سمح لها بالتحوال في أنساق السرد الملحمي والإنشائية الحوارية المشكّلة لهذا العالم التركيبي الذي عليه النص بشكل مرّن ومتقن. ممّا يجعل الكتابة الدرامية تنخرط في ذلك الإيقاع الشّفيف المعتمد على تبادل المواقع وتجاور المواقف الدرامية وتنافرها.

غير أنّ هذا الجهد الذي أنتج هذا النصّ في صيغته النهائيّة هذه ما كان ليستقيم لولا معاضدته بجهد آخر مضعف تمثّل في ذلك التواطؤ بين مهجّتين متقابلتين ومتلازمتين أي بين ملكة تدقّ الكتابة عند جلييلة بكار وقدرة الهيكلية الصارمة عند الفاضل الجعيايبي لهذا التدفق ذاته. وليس هذا التواطؤ إلا تلك الحركة التبادلية بين طرفين قد يختلفان في طبائع إنتاج الفكرة ويجمعان في طرائق صياغتها. وليست هذه الحركة أيضاً إلا ما يعبر عنه جهد الصياغة الدراماتورية التي ضمن لها الفاضل الجعيايبي

أسئلتها التوليدية الناجمة من خلال تطوير الشخصيات وتأسيس فاعليتها عبر ابتكار المواقف اللازمة لها وإبراز تبايناتها وتنسيق تقاطعاتها وتأصيل مسالكها في متهاة عالم الخشبة المتخيّل بكل ما تفرضه هذه الخشبة من اختبار دائم للمُحصّلة الحرفيّة وما تتطلّب من اقتصاد في اللّغة وتكثيف لمقاصدها ورهان متجدّد على بلاغة الصّورة ونشاطها.

"النصّ هو تلك الآلة الكسولة التي تتطلّب من القارئ جهداً تعاونياً من أجل ملء فضاءات الشيء المسكوت عنه أو المصرّح به داخل البياض... فالنصّ ليس شيئاً آخر غير تلك الآلة الافتراضية". هكذا يعرف ويقيم أمبرتو إيكو Umberto Eco خصوصية كلّ نصّ إبداعيّ بما في ذلك النصّ المسرحيّ في علاقته بلحظة القراءة.

ولعلّ النصّ المسرحيّ يظلّ أكبر أجناس الكتابة الإبداعية توفراً على هذا النوع من الفضاءات والفراغات ومواطئ البياض لأنّ كاتبه - وهو شاعر عصره وضميره - يراهن على ديمومته واستمراريته من أجل بلوغ سدرة الخلود، والتي لا تعني غير قابلية النصّ المسرحيّ بعلاماته الكبرى وما يرشح به من معانٍ جوهرية في الانخراط في أزمنة أخرى وفضاءات متعدّدة بفضل انصياعه الدائم للقراءة بصيغة التعدّد والاختلاف. ونصّ "جنون" يتوقّر على هذه الفراغات وهي فراغات مقصودة أرادها الحدس الانتقائي والمهارة التركيبية عند الكاتبة لتجعل من هذا النصّ "آلة نشيطة" يرتقي فيها خطاب الاحتجاج إلى ذرى الشّعور العالية.

عبد الحليم المسعودي

جويلية 2001



# لماذا؟

## حوار بين جلية بكار والفاضل الجعايي

الفاضل : ماذا لو جربنا لعبة الأسئلة والأجوبة ؟

لماذا كان اختيارك نصّ "يوميات خطاب فصامي" ؟  
جليلة : لتغيّر الوجهة أوّلا ولتحدّث عن عالم نعرفه أقلّ بكثير  
من العالم الذي اعتدنا الحديث عنه.

إنّ نصّ ناجية الزمّني السّردي هو بمثابة النزول  
الحقيقيّ ليس فقط في عالم المرض النفسي بل نزول  
في عالم غريب، شديد الخصويّة، محكم  
الثقّرات، قلما تتمّ الإشارة إليه وإبرازه.

عالم كثير التكتّم حوله، عالم محتقّر، منبوذ  
ومطموس وموضع لرفض متعدّد الأسباب وغير  
مبّرر.

إنه عالم، أو بالأحرى عالم رابع بقيمه ونقاط  
ارتكازه وطقوسه وأنماط عيشه التي تستعصي علم  
الاجتماع.

إنه عالم يمثّل غالبيّة سكّان الحواضر وضواحيها  
ولأنه يشير القلق، ويمثّل خطرا محدقا بالنسبة إلى  
البعض وعصيّ التّحكّم والإحاطة بالنسبة إلى البعض  
الآخر، فإنّ هذا العالم أصبح بالنسبة إليّ موضوع  
"انغماس" حتميّ فيه.

والذهاب نحو الآخر، هذا المجهول المهمل دون  
أحكام ايديولوجيّة أو سوسيوولوجيّة أو عاطفيّة  
مسبّقة، هي فرصة تكشّف ووقوف على خبايا أخرى  
وتحديد لعناصر الخوف والحذر، ومحاولة فهم لكلّ  
ذلك دون أيّ اختزال أو استنقاص.

الفاضل : إذن ليس الجنون الملخص في عنوان "حكاية  
تحليل نفسي دون أريكة" هو الذي حفرك على هذا  
الاختيار؟

**جلیلة :** أجل ولكن بصفة قسریة.

إنّ اعتبار "دون أریكة" تعني فعلا ما هو خارج المؤسسة الاستشفائیة وتحديدًا في موضع المريض، وإذا تحرّنا على التّعبير عنه داخل عائلته وفي حیة وفي أماكنه الأثيرة (البحر، المساحات الغائمة، المقابر، الأماكن المعزولة وغير المشرّعة على النّاس أي في الطّبيعة بشكل عامّ) فإنّ الشّيء الذي يحفزني أكثر ويشدّني بقوة عند هذا المريض هو قدرته على أن يكون في المدار الإنسانيّ، بفضل أو بالرّغم من انحرافه الذّهاني وهذيانه. إنّ حديثه المتعدّد الدلالات حول الحیاة والموت والعائلة والسّلطة والمسؤولیة، والحریة هو في الحقيقة كلام يتنزّل في صميم الجوهر الفلسفيّ، كلام مسكون بالمفارقة ومخترق لكلّ امتثالیة، بعيد عن الابتذال والموضع الجماعي المرتبط عادة بهؤلاء الذين لا حقّ لهم إلا في الكلام المستلب بعد أن تمّ منعه ومصادرته طويلا.

**الفاضل :** ولكن في نهاية الأمر المسألة تبقى تحوم حول شخص مستلب ذهنيًا.

**جلیلة :** أجل، ولكن كلّ شيء يحدث، كما لو أنّ استلابه الذّهنيّ وهنا أفضل الحديث عن سلوك منحرف - كما تدقّ معناه ناجية الزّمني - ولد صحوة لفظیة، أي من أجل إعادة التمكن من لغة حقیقیة، لغة شعریة تجعل خطابه أحيانًا غير متماسك في الظاهر إنّما أكثر صدقًا وكثافة في الواقع.

ولعلني في موضع ما أعتقد أنني تماهيت معه كثيرًا وأدرك هذا كلّ يوم وبأكثر حدّة في كلّ سطر أكتبه ولربّما يعود ذلك إلى كوني ممثلة تكتب كلام "مجنون" يرتقي ليكون كلام "مهرّج" بهلوان.

**الفاضل :** تقولين إنك تجدين نفسك فيه، في عائلته والحال أنّه كان من المنتظر أن تجدي نفسك في الطّبيعة النّفسية التي تتقمّصين شخصيّيها في نفس الوقت.

**جلیلة :** هذا صحيح. ففي القراءات الأولى "المتقفة" للنّص وجدت نفسي إلى حدّ ما في الطّبيعة النّفسية إذ



موقفها وطريقة مقاربتها وصراعها ضدّ المؤسّسة  
بدت إليّ في غاية من الأهميّة. فصمودها وبقاؤها  
وقيّة لمبادئها الأخلاقيّة وقناعاتها الفلسفيّة وانخراطها  
في حرب ضروس لهي بمثابة البحث عن ذاتها وهو  
أيضا بمثابة "تطهير" شخصيّ حقيقيّ...  
أجل ! كنت تحت طائلة إغراء الشّخصية. وكنّت  
أنت إلى حدّ ما مساهما في ذلك.

وشيثا فشيئا وعلى ضوء نقاشاتنا حول مسألة  
الاقْتباس والكتابة الدراماتوريّة والشّخصيات، فإنّ  
شخصيّة "نون" وبقية أفراد عائلته بدأت تكتسب  
أهميّة متزايدة وفجأة بدأت شخصيّة الطّبيبة النفسيّة  
ورحلة بحثها تستقرّ في المستوى الثّاني من الاهتمام  
بالرّغم من التّلازم الوثيق بينهما. لكنّ صفتها  
كـ"مولدة" وكمساعدة على العبور وكمرافقة كاشفة  
تظلّ ذا أهميّة قصوى.

**الفاضل :** والجنون، كموضوع للكتاب في هذا ؟

**جليّلة :** إنّهُ نقطة ارتكاز، ولكن ليس بالنقطة الوحيدة.

**الفاضل :** ولو كان "نون" منحرفا عاديّا فهل كان يثير  
اهتمامك ؟

**جليّلة :** كانت الأمور تأخذ منحى آخر بطبيعة الحال، فلن  
يكون هذا الكتاب أصلا، ولن تكون "صعقة الحبّ"  
الفنيّة من أجله.

وبالمقابل، فلو كنت عثرت على كتاب يتحدّث عن  
حالة اجتماعيّة بنفس تلك القوّة وبنفس تلك المغالاة  
التي عليها الشّخصية المنازعة وعائلتها ونفس  
المقاربة الدّوّبة لدى المؤلّفه لاتّجهت إليه بكلّ  
قواي.

**الفاضل :** ولكن "نون" متفرّد لكونه فصاميّ وليس مجرد  
شخص منحرف ؟

**جليّلة :** أجل، غير أنّ الذي يهمني من خلاله هو العالم الباطن  
للذات البشريّة وليس جنونها وانحرافها ووضعيتها  
الاجتماعيّة.

والذي انجذبت إليه ناجية الزّمني هو الذي جذبني  
في الحقيقة، أي الحالة والتفرّد ولأنّ "نون" يقاوم

للإعجاب.

إنّ مجنوننا عادياً ومنحرفاً تافهاً ما كان ليثيرني  
أو يستحوذ علي اهتماماتي.

**الفاضل :** إذن تبقى الطيبة النفسية سبباً في الكشف عن هذه  
الحالة ؟

**جلييلة :** قل خاصة قدرتها على فك الشّفرات.

فهي تهتمّ بحالة واحدة من بين آلاف الحالات لأنها  
قادرة حدسيّاً على إدراك أنّ "نون" يمتلك شيئاً  
مميّزاً لا يمتلكه غيره وهي غريزة شديدة القوّة من  
أجل الحياة قد تكون ربّما عند بعض الناس مجرد  
غريزة في الاستمرار في العيش.

وناجية الزّمني تتحدّث في كتابها عن "تحوّل  
اللاوعي" كميثاق دمويّ، شيء شبيه بتحرك عنيف  
وثقيل لطاقة قتاليّة حرونة لا حدود لها.

وأعتقد أنّ الطيبة النفسيّة جذبتها سمة الفنّان عند  
المريض وبحثه عن شيء مطلق أكثر من كونه  
انطوائياً، وسمة الفنّان عنده سمة نبيلة بعيدة عن كل  
معني فولكلوريّ.

إنّ النظرة التي يلقيها على العالم نظرة شخص مقاوم  
ضدّ الموت. ولعلّ إحساسه بالاختلاف عن الآخرين  
والذي يحمله في باطنه بشكل دائم رغم أميته  
المدقعة هي أجمل ما يهرني فيه وما يثيرني.

**الفاضل :** ما هي الطّريقة التي باشرت بها هذا العمل وأنت  
تحمّلين أعباء الكتابة في هذه المغامرة المسرحيّة  
الجديدة ؟

**جلييلة :** ليست المسألة عمليّة تأمل مستقلّ أو اقتباس روائيّ  
لنصّ أصليّ بل مسرحية لهذا النصّ أي إخراجه  
فرونيّاً وجعله راضحاً للعرض وللتجسيد بالصّور  
والكلمات.

أضف إلى ذلك متطلّبات منهجيّة "الكتابة"  
المسرحيّة. غير أنّ في هذه الحالة الخاصّة تبقى  
الكتابة في تبعيّة لعوامل أخرى تتجاوز الكتاب نفسه  
وهي ما تتطلبه الخشبة (صور، أدوات، أشكال

حر كية سردية) والممثلون (طاقتهم الدائية وطاقه تكاتفهم) والظروف المادية الحافسة لتحقيق المشروع. لذلك فإنّ القضية تكمن بالنسبة لي ولك أيضا في كيفية القبض واستجلاء وتطوير الشخصيات أو القطع نهائيا من أجل خلق علاقات جديدة بين هذه الشخصيات وبناء عالم جديد.

من جهة أخرى فإنّ النصّ الأصليّ مكتوب بالفرنسية وهو ينطوي على العديد من الصعوبات المتعلقة بنقل طروحات المريض إلى اللهجة التونسية المحلية واقتباس التفكير النظري للطبيرة النفسية إلى المسرح. وفي الحالة هذه كيف يمكن العثور على العبارات التونسية الصّحيحة والحقيقيّة انطلاقا من الكلمات الفرنسية إلى المحكيّ التونسيّ ؟

هناك بالضرورة نوع من الإتلاف وحركة ذهاب وإياب لا يمكن تجاوزها وهي مليئة كلها بالفخاخ. **الفاضل** : الرّهان المركزيّ في هذا الاقتباس ألا يكمن فعلا وبصفة محدّدة في اللقاء-المواجهة بين حقيقتين، بين تجربتين معيشتين؛ تجربة الكاتبة وتجربتنا نحن؟ والاقتباس أليس بالضرورة خيانة ؟

**جلييلة** : إذا كان عليّ أن أخون أحدا، فأنا أفضلّ خيانة ناجية الزّمني لا "نون" لأنّ هذا الأخير ذات معذّبة. والكلام الذي حاولت ناجية استكناها منه هو في غاية الندرة والقيمة. ومع ذلك يلازمي شعور بأنني أستعمله هو في مكان ما في حين أنني أقف مع ناجية على قدم المساواة في جلّ الأحوال.

**الفاضل** : لا تنسي أنّ مؤلّفة الكتاب تردّدت هي نفسها بين اليوميّات والرّواية ؟

**جلييلة** : هي منخرطة في التّأويل، أمّا نحن ففي مقام تأويل التّأويل.

هي تتحدّث من خلال أدوات الحكوي ونحن نتحدّث من خلال آليات المسرح، وإن كان هذا المسرح ملحميا أي سرديا دراميا في نفس الوقت. فكيف مع ذلك العثور على العبارات الصّحيحة، على الصّور المشحونة النابعة مني ومنك مع أنها آتية

وهو أيضا "نون" ؟

الفاضل : على ذكر ناجية كيف تتم علاقة المساواة وتحديدًا بين كاتب حيّ وكاتبة أخرى تتوارى وراء كلمة "مقتبس" ؟

جليلة : إنها قبل كلّ شيء علاقة بين مثقفة تعرف مسيرتنا الفنية وتكنّ لها احتراماً حقيقياً، بيني أنا التي أحمل نظرة إنسانية وفنية وأحيانا نظرة نقدية تجاه كتابها، أي تجاه مقاربتها كمؤلفة وحقيقتها الخاصة ومدى صحّة أساس مغامرتها الطيبة والإنسانية...

ومن جهة أخرى فإنّ مساهمتها على المستوى العلميّ وفي كلّ ما يتعلّق بالمسائل النظرية كان كبيرا وعلاوة على ذلك فهي لم تطرح أيّ مشكل مقابل ما يجب أن نحفظ به أو ما يجب أن نحذفه من نصّها، أو حتّى بخصوص "قراءتنا" المختلفة لكتابها.

ولكن كلّ هذا لا يزال عرضياً، فالعمل متواصل وإن كنا قد ضاعفنا اللقاءات معها، فإنّ ناجية الزماني لم تحضر إلا تمرينا واحدا إلى هذا اليوم.

رفراف، أوت 2000

## كيف ؟

كيف يمكن أن نقتبس للمسرح سردا طبيًا  
كيف نطلق من الواقع وهو واقع تَمَّت معالجته وتصفيته  
على ذاتية الآخر : مؤلفة قصة السرد هذه  
وهي قصة شاسعة، لا خطية، غريزية، استطرادية النزعة،  
وموزعة على خمسة عشر عاماً من العلاج والحياة  
كيف يمكن أن نترجم هذا النص، أن نقتبسه، أن نخترله،  
أن نحوله للمسرح دون أن نخونه

كيف نذهب في اتجاه نسغه ونبرز مادته الأساسية  
دون أن نقزّمه أو نشوّه  
إنها مجازفة صعبة ذات رهانات مضلّلة وعقبات متعدّدة.

كيف يمكن أن نحول ونبدّل كلام المؤلف، التزامه  
وعناده، قناعاته بالمساءلة وتمريره فعلا على غراييل  
الامتحان النقدي

كيف يمكن مسرحيًا أن نقارب الجنون وأن نتحاشى  
مخاطر الابتذال والموضع الجماعيّ والعرض المحكوم  
بالصدفة والارتجال والاستسهال والنمطية

كيف تظلّ الحاجة المركزية في نفس الوقت قادرة على  
جعل الرّهان صاف وشفّاف. والخطاب ممكنا وفي متناول  
الفهم الجماعيّ

كيف نستطيع من أجل ذلك، أن نجعل العودة إلى شكل  
مسرحيّ بسيط ممكنة

مسرح سرديّ اقتراحيّ ملحميّ، لكنّه يشترط وضعيّات  
تفترض سير شخصيّات دراميّة تقتضي تطويرا محكما

شبه خارق ومقتصر على المريض  
أيّ مكان نشئ وأيّ فضاء نرسم من أجل رواية فضاءات  
متعدّدة واقعيّة حقيقيّة تارة وذهنيّة خياليّة تارة أخرى  
كيف نقترح تحديدا للذهني. وحاشية رغباته وصوره  
الاستعاريّة والشعريّة والهديائيّة المرثيّة والسمعيّة التي  
تجرّفها حمّى المريض الجنونيّة  
وأية أدوات سرديّة نجعلها في متناول الممثل السارد  
المتقمّص للشخصيّة  
كيف نوفي دين كلّ هذه الترسّانة من العلامات الدالّة  
والعناصر الملموسة وإكسسوارات الاستدلال والسرد  
والعرض القابل لمحايسة اللامعقول ومعانقة اللاوعي الهادر  
والعالم الافتراضي ولكن أيضا المسكوت عنه، بالصّمت  
الفصيح والإيقاع البليغ.  
إنّه تمرين عسير عنيف محفوف بالمخاطر، مزروع  
بالفخاخ والمكائد...  
تمرين دائم السّؤال ودائم المراجعة...  
تمرين ممتحن باليومي، وفي الفضاء الأوحّد للحقيقة،  
فضاء المفارقة المتوهّجة : الخشبة.

جريدة بكار والفاضل الجعابي

## من؟

نون : شابّ ذهانيّ، شاعر في صميم الرّوح، سلخته الحياة  
بلا رحمة، وأخصته أشكال السّلطة الأكثر محقا  
يسقط في ارتكاب الجنح ثم في الجريمة  
يللمم أشلاء "أناه" الممزّقة بفضل امرأة وبفضل شيء آخر...  
ربّما الشّعر

هي : طبيبة نفسانيّة محنّكة ومتمرّسة تنحدر من آخر حلقات  
الطوباويّين، مخلصي البشريّة

الأمّ : زوجة معنّفة ومضطهدة، صلبة الجأش حسنة التدبير  
دون تشدّق، هشة الصّحة صعبة المراس تقود عائلة عنيدة  
بسلطة خرساء

تشكّ في طريقة الطّبيبة النّفسانيّة وتنقلب غيرة من أجل ابنها  
المريض رغم حبّها التفاضلي والغريزي لابنها البكر "خاء"  
ذي السوابق العدليّة

تلجئ من أجل مداواة ابنها المريض إلى رحاب الزّوايا  
مستجدية تطبّب الشّيوخ وبركات الأولياء الصّالحين

خاء : شقيق نون الأكبر، مروّج مخدّرات ووسيط عهر  
محترف، يدفع بأخواته للبعاء

حديث خروج من السّجن بعد أن طلق زوجته الألمانيّة التي  
"افتكّت" ابنه الوحيد

يحافظ على علاقة عفنة سادو-مازوخية مع أمّه، ويغذّي  
كرها "فحوليّا" لأخيه الأصغر "نون" مساهما في تعميق  
سقوطه في الجريمة الجنونيّة

واو : إحدى أخوات "نون" الصّغيرات. قريبة المزاج  
والحساسيّة من أخيها "نون" الذي ترفض اعتباره معوها

مغامرة، سوداوية المزاج، عاشقة لمصوّر فوتوغرافي يعدها  
بمستقبل فني وهمي وهي ترفض بشكل مطلق تطلّعات  
"جيم" الشذوذية صديق أخيها

سين : شقيقة "نون" الأخرى، طفلة. أم يعيش مولودها  
الطبيعيّ في حضانة أحد الأعمام البعيديّ القرابة  
تشتغل خادمة صالحة لكلّ شيء عند أحد المتقاعدین الأثرياء  
انتحاريّة ووحيدة وهي على حافة الذهان الهذيانيّ. تبدي  
عدوانيّة شديدة من أجل الدفاع عن نفسها وإخفاء بؤسها  
العميق



قاف : أصغر شقيقات "نون" متخلّفة نوعا ما وخرساء لكنّها  
متحفّزة الذهن

هي عبارة عن كبش فداء بالنسبة لـ "نون" الذي يرى فيها ما  
يراه في بقيّة شقيقاته وأمه تجسيدا للشرّ المطلق كما رسخته  
الأخلاق الدنيئة ونظرة الأب الفحوليّة

جيم : صديق "نون" ورفيقه  
عاشق مضطرب، ومغتاض لـ "واو"  
عاطل عن العمل وورث ثريّ لعائلة تجار زنوج، وهو آخر  
حفيد لأجدادنا الأفارقة.



# جنون

عن يوميات خطاب فصامي لناجية الزرني

النصّ : جليلة بكار

الإخراج : الفاضل الجعايبى

مع

جليلة بكار - فاطمة بن سعيدان

محمد علي جمعة - كريم الكافي - نجوى الجندوبي

بسمة العشي - صالحة النصراوي - قيس العويديدي

الاقتباس والدراماتورجيا : جليلة بكار والفاضل الجعايبى

السّينوغرافيا : قيس رستم

المساهمة الفنيّة : نوال اسكندراني

الموسيقى : يفيو وألدو دو سكالزي

الإضاءة : الفاضل الجعايبى

مساعدة المخرج : نرجس بن عمّار

توضيب الإضاءة : محمّد بلحاج محمّد

توضيب الصّوت : هشام الشّيرشي

توضيب الملابس : منية زرّوق

توضيب الرّكح والسّتائر : ابراهيم الأمير

عزّ الدّين بن غربيّة

محرز دغمان

يعرب معروف

صور:

إدارة الإنتاج : الحبيب بالهادي

فاميليا الإنتاج

أنجز هذا المشروع بدعم من وزارة الثقافة وبمساهمة بلدية تونس



# مدخل

يطلع الرّيدو  
ثمانية ممثّلين واقفين  
واحد بجانب الآخر  
بين زوز ميكروبات

مدّة  
الممثّلين يبدأو يتحرّكو  
الوقفة تتبدّل  
كلّ واحد منهم يدخل في شخصيّة  
الممثّلة 1 تقدّم وتدور لهم  
تخزر لكلّ واحد فيهم  
العلاقات تتكوّن  
تتطوّر  
يتفرّكو  
يخرجو  
ما تبقى كان هي ... ونون

# نَحْبٌ نَقْتَلُ

كلّ واحد منهم ياقف قدام ميكره

هي : كيفاش صبحت اليوم

نون : نحبّ نقتل

هي : شكون

نون : نشدّ مرا

نقصّ لها راسها

يديها

ساقها

نفرى لها كرشها

نخرّج لها فرتها

بزيها

نزرّها طروف

نشعلّ فيها النار

نأخذ الرّماد

نخبّيه تحت زليزيّة في الدّار

ونرتاح

مهلة

هي : علاه تحبّ نقتل

نون : موش أنا

الآخر

هي : شكون الآخر

نون : هو

هي : شكون هو

نون : واحد فيّ يحبّ يقتل

والآخر يعسّ

أنا نقتل

وأنا نعرّسّ باش ما نقتلش  
أنا نقتل  
وأنا نقول لي ما تقتلش

مهلة

عييت  
علاش مانيش كيف الآخرين  
علاه هالبدن اللّي لابسني  
مستعمرني  
حاولت نبعده  
ندّزه  
نخرّجه  
أقوى مني  
نكره روحي  
ونكره النساء  
النساء ما يجييو كان البلاء  
قالها لي بابا  
ابعد عليهم  
كلّ مرا فيها شيطان وسواس خناس  
تخرج معاها تسربي هولك  
يمكنك  
يعبدك  
يسكن فيك  
يهتكك  
يلزمني نقتل  
نذبح  
نزرّر ونستفعل  
باش نتفرهد


يخرج

مهلة

هي تتبعه بالنظر

وتمشي

تأقف قدام الميكرو متاعه



ترشق عينيها في القاعة

هي : الدّقيقة الأولى

من الدّقيقة الأولى اللّي عينها

ترشقت في عينه

برق لعج

هزّها

حطّها

تمكّن بيها

زعزعا

من الدّقيقة الأولى اللّي راته فيها

في مارس 98

متكّي عالحيط

مقوّس ظهره

مكزّز سنّيه

عينه جمّر

حسّته

حسّته موش كي الآخرين

أشهرة تستنى فيه يدزّ الباب ويدخل

أشهرة تعسّ عليه بمسارقة

كُبة مخبّلة في يدّها

وخيط أحمر ممدود بينها وبينه

تجد فيه بالشّعرة

خايفته لا يتقطّع

ونهار

صبحيّة من صبحيّات جوان

أربعة شهر بعد الخزرة الأولى

هي قاعدة وهو دخل

قال لها نحبّ نقتل نذبح  
نزرّر ونستفعل  
باش نتفهد

## ترجع للميكرو 1

الطبيب اللّي شافه  
قال عنده تفكّك في الشّخصيّة  
ينبأ بحالة فُصام  
والفُصام مرض ذهني  
يتمثّل في انشطار الذات  
وفقدان المريض للواقع  
مع انطواؤه على ذاته  
وانزواؤه في عالم خيالي

نون

25 سنة

بطل

هرب من المكتب عمره اثناس  
دخل للإصلاحية قبل الخمس طاش  
للحبس مع السّبع طاش  
للجيش في الثمن طاش  
وللرّازي ما فاتش الأربعة وعشرين

العائلة

البو ديواني

مات عنده عامين

الأمّ جابت حدّاش

ماتولها زوز

الكبير في الحبس

الأخت الكبيرة معرّسة البرّة

في الدّار قعدولها نون وثلاثة بنات



واحد في الإصلاحيّة .  
واثنين هجّو لبرّ الطليان

تقدّم بالميكرو

شهرين آخرين تعدّوا  
دخل فيهم نون وخرج من السّبيطار  
وعاود دخل وخرج من السّبيطار  
هرب ورجّعه للسّبيطار  
عطاوه الدّواء  
وعاود هرب باش ما ياخذش الدّواء  
عمل زبلة باش يرجع للسّبيطار  
وياخذ الدّواء  
دوامه تعرفها مليح

نون يرجع  
يكركر في ميكرو وكرسی  
خطوة ثقيلة  
الريدو الأحمر يهبط وراه

ساعات تعرضه في مزاز  
وإلاّ جنينة السّبيطار  
يدور وجهه  
يعمل روحه ما يعرفهاش  
وساعات يدخل يقعد  
ويبدأ يحكي

نون يحلّ كرسيه ويقعد

نهارتها دخل متردد  
عروقه خارجة  
أعصابه متوتّرة  
نازل على كراسه  
مسكّر يديه  
كاينه خايف لا تفلت منهم حاجة تخونه

الخرزة غايبة  
البدن متوجع  
والعقل سارح  
طاير محلّق  
سحاب مقطّع بين الأرياح

# الدَّاءُ وَالدَّوَاءُ

هي تمشي له  
تحطّ الميكرو قدامه  
تستويله رأسه  
وترجع لميكروها

هي : لابس اليوم

نون : لا

هي : علاه

نون : الدَّوَاءُ

هي : آش بيه الدَّوَاءُ

نون : الدَّوَاءُ موش يداوي

في الدَّاءُ اللّي يخرب فيّ  
يلزمني نبطله

هي : لا

الدَّوَاءُ في حالتك لازم

نون : لا

الدَّوَاءُ هو الدَّاءُ

الدَّوَاءُ هروب

كي نضيع نهرب لبدني

وبدني يهرب للدَّوَاءُ

إمّاله أنا لوين نهرب

هي : وانت مناش تحبّ تهرب

نون : من راسي

هي : آش بيه راسك

نون : صوت

هي : صوت

نون : صوت

صوت ديما عابدي

يحكي مع يدّي

هي : آش يقول لها

نون : "خرّج له عينيه"

يدّي تحبّ تخرّج لي عينيا

هي : وانت ما تنجّمش تمنعها

نون : ما نُحْمَكش

ما نُمْحَكش

هي : ما تحكّمش فيها

شكون إمّاله

يحكم

نون : الصّوت

ساكن هوني

في طاسة مخي

عابدي

هو يحملك

يمحك

يحكم فيّ

هي : آش يقول لك

نون : إبعده عالشيطان

ما تقربش النساء

ما تخزرلهمش

ما تحكّيش معاهم

ما تخليهمش يزوزوك

يمسّوك

إبعده عالشيطان

ما إنجمش نقول له لا  
ما إنجمش نكذب عليه  
يلزمني نقتل  
نذبح  
نزرر ونستفعل  
باش نفرهد

هي : مناش

نون : من التصاور الفايضة في مخي

هي : أما تصاور

نون : دُمومات سايلة تقبب

وذيان تغلي

هايجة حاملة

زادمة

عايمة

غامّة البلاد

أكداس أبدان ملطخة

مكسرة

مززرة

أشجار

حشايش

وهوايش مطرشقة

مشرقة منشرة

وأنا واقف

جثة بلا راس

كرومة فايضة منها حصّة عكري

نتفرج ونبكي

والصوت يقول لي

"هزّ سكينه وابعج

إذبح"

نعرف هذا مرض

نعرف

ريت في التلفزة فيلم

L'étrangleur de Boston

à 21 h. 30, après les désinformations

يذبح في النساء

شيء أقوى منه

ما ينجمش يشدّ روحه

أنا كيفه

هي : آش تحسّ

نون : نحسّ بدني مفزّق

ينظّي وجهه بمريوله

مفترش كي السّحاب

مجبور نوجعه باش يتلمّ

يعزّي على جرح في صدره

هي : شكون جرحك نون

نون : في الجيش

هي : تعاركت

نون : حبّيت نعدّي عامي

باش نهرب من همّ الدّار

طلع الجيش أتعس

تخنقت حبّيت نموت

بلام حلّيت صدري

أنا حلّيت وهو ما خيطوني

خمدوني

وروحو بيّ

هي : وقتاه جيت أول مرّة لهنّا

نون : روحو بيّ

نون يغيب

يسرح مع روحه

هي : وقتاه جيت أول مرّة لهنّا  
نون ... وقتاه

يرجع

نون : نهار عرس أختي

عيطولي باش نشهد

هي : إنت الكبير

نون : الكبير في الحبس

وبابا مات

ما نعرفش آش صار

شدّنتي كُريز وقت الفاتحة

هو ما قالو

"أعوذ بالله من الشّيطان الرّجيم

بسم الله الرّحمان الرّحيم"

وأنا طرّشقت بالضّحك

نضحك

نضحك

نضحك

نضحك ونبكي

نضحك ونبكي

حتّى تقطع عليّ النّفس

جابوني لهنّا

توّه عام

صوته يتبدّل

يتشّج

وقلت لك

الدّواء متاعك موش يداوي

في الدّاء اللّي يخرب فيّ

يلزمني نبطله  
هي : وأنا قلت لك  
الدّواء في حالتك لازم

يصيح

نون : الدّواء هو الدّاء  
ما عايش نحبّ نحكي  
نحبّ نموت  
بدني  
الكلي نوجع  
معدتي  
محاشمي  
ساقيا  
شعر راسي يقطّع  
وانت تواسي فيّ  
كي الجلاد اللّي يواسي  
في المحكوم عليه بالإعدام  
أعمل لي تصاور  
حلّل لي دمّي  
وقول لي آش عندي



# التحليل

هي تدور للقاعة

هي : باش تريضة

وتساخذ بخاطره

طلبت يعملو له تحاليل كاملة

طلعت عنده مرضة أخرى

نون : السyphilis

هي : مرضة مخطرة وتعدي

يلزمها تداوى ليه ليه

وخارج حيوط السّيطار

بما أنه عمره ما يطول فيه

في الدّار

فرملي يمشي ويجي عليه

يزرّق له

وهي تلهي بيه

بعيد على جوّ السّيطار

بعد نقاشات طوال

الإدارة قبلت

وهي لقاتها فرصة

باش تدخل لدار نون

وتتعرفّ على عائلة "المجنون"

توخر بخطوة

تبدأ تنزع في منديلها

يهبط الضّوء

# الرواح

يطلع الرّيدو  
نون متكي على الطاولة  
سارح  
والعائلة مفرقة  
اللي قاعد  
واللي واقف  
والكل يقحرو للقااعة  
الثلاثة أخوة  
ساء واو وقاف  
جيم الصّاحب  
والأم خالتك شا  
هي منديلتها في يدها  
تشقّ الرّكح  
تتفرّج فيهم  
وتاخذ ميكرو 2  
تحكي فيه

هي : نهارتها خلطت موخّر  
تلقاهم عقاب عشاء  
نون متكي على طاولة الكوجينة  
لا عرفته راقدا لا غايب  
سلمت عليه ما جاوبهش  
ساء : اليوم ما جاش  
هي : قالت لها شكون  
ساء : الفرلمي  
هي : في العادة تجي هي وآياه

نهارتها تشدّت  
السّبطار خايض

ساء تخطف الطّاوله  
وتخرّجها  
تخلّي نون معلق

مريض زدم على فرمليّة  
وبلقشة بلاّر  
ذبحها من الوريد للوريد



نون يطيح  
واو تخرج

قرّبت لنون  
قالت له لابس  
ما سمعهاش  
خذيت دواك  
ما جاوبهاش  
تحسّ في روحك خير

الأم سيقارو في فمها  
تقدّم للميكرو 1  
تتكلم فيه

الأم : خير من شكون  
خير من شنوة

هي : قائلها خير من قبل

الأم : خير من أمس ما ظاهرلي  
خير من غدوة ما ندري

هي : قالت لها

ديما تجاوب في بقعته

الأم : ثلاثة أيام ما حلّش فمه  
لا شرب لا عليك

هي : قالت لها خذاش دواه

الأم : تشمي في الريحة

هي : ريحة الدّواء

الأم : لا

هي : ريحة البحر

الأم : لا

ريحة الدّار

الأمّ تخرّج الميكرو وتغيب  
قاف تخرج

هي : كيفاه صبح اليوم

جيم : تاغب برشا

واو ترجع

جيم يمشي لها

يوشوشلها في وذنها

اجبدلها على الدّواء

واو : عندك Valium

هي : علاه

واو : نحبّ نرقد

هي : بالـ Valium

واو : عندي الشقيقة

هي : قتلتك ما نداويش بالدواء

تجبد سيقارو

تشعل بريكية

نون عاطيها بالظهر

نون : إمالة قول لها ما تكيّفش

واو : ما تكيّفش

هي : يقلقه

نون : قول لها يقلقها هي

تهز كرسى

وتوخر بيه

تخطه

وتقعد

هي : مشى للبحر

واو : الماء مقصوص

نون يهز راسه للسقف

نون : قول لها ريت تصويرة بابا

واو : ريت تصويرة بوه

هي : موش بوك انت زاده

واو : يشبه له

نون : قول لها الفرملى متاعها ما نجبوش

هي : علاه

نون : عنده شلاغم ويتزعبن عليّ

هي : آش قال لك

نون : ما نستناش حتى يقول

نعرف آش يخمم فيّ

اسألها لها تصلّي

واو : تصلّي

هي : وإنّ تصلّي

جيم يرجع

يلصق واو

جيم : أنا نصلّي

نون : نحبّ ربّي أنا

وربّي يحبّني

الأمّ تدخل بمسارقة

الأمّ : كان جاء يحبّك

راهو فرّج عليك

نون ياقف

وين مروّح

نون : نمشي نعمل تبجيحة

نتوضّي

ونعطي حقّ ربّي

الأمّ : ما تمشيش للشّط

نون : نمشي للشّط

ما تحكّميش فيّ

عندي الشّعرفي ساقني

لواو

وانت استري روحك

لا ربّي يعاقبك

لجيم

وانت ما تلصقهاش

لا نقصّ لك

لسانك

نون يخرج

نمشي للشَّط  
نمشي للجماع  
ونمشي للجنة  
وإنتم لجهنم داخلين

مهلة

هي تشعل سيقاروها

هي : خايفة عليه

الأم : غرق لي مرتين

هي : وقتاه

الأم : عمره خمسة سنين

هي : توة راجل

الأم : عندي نا ما زال غشّير

تهزّ كرسي وتخرج

واو : يبرى

هي : من الـsyphilis

ساع ترجع

في يدها سطل حديد

تحطه بهذا الطبيبة



- ساء : من الهبال  
مرضته تعدي
- هي : الهبال
- ساء : الـsyphilis
- هي : كان بالعلاقات الجنسية
- ساء : مازالوله برشا زرارق
- هي : زوز برك
- ساء : ومن بعد ترجعوه للسّيطار
- هي : ما نعرفش
- ساء : يلزمه يرجع للسّيطار
- هي : علاه
- ساء : شفّتيه
- النّهار وطوله يا راقد  
يا يسبّ ويهدّد  
وساء تصرف وتوكّل
- هي : شكون ساء
- ساء : نا الرّهط اللّي قدّامك
- هي : وأمه
- ساء : تساسي
- واو : واو تخيّره في الدّار
- هي : شكون واو
- واو : نا العزاء اللّي قدّامك
- جيم : ونا ثانة نخيّره في الدّار
- ساء : مع آخر زريقه نرجعه للسّيطار
- واو : حتّى تولّي تحكمي في الدّار



ساء : إمالة شكون يحكم  
واو : حتّى تبلع الأمّ  
ساء : وقبل ما تبلع  
نحكم فيك وفيها  
وفي الرّهط اللّي لاصقك

ساء تخرج

في يدها كرسي والميكرو 2

مهلة

هي : علاه تخيره في الدّار  
واو : على خاطره كيفي  
هي : كيفاش كيفك  
واو : يكره السّيطارات  
والحبوسات  
والقفصّات  
مينن هبت ودبت

هي : تحدم

واو : ممّا تجبّش

هي : علاه

واو : ماثماش اللّي يساعد

هي : شنوّة اللّي يساعد

الأمّ تدخل

الأمّ : اللّي يجيب الدزّة من غير تعب

هي : شكون بصرف

الأمّ : نا نصرف

جيم يحكي وهو لاصق واو

يدحنس عليها

جيم وناثانة  
هي : تخدم  
جيم : لا  
الأم : يخدمو عليه  
جيم : عندي الوالد  
هي : مركاتي  
جيم : كبير  
هي : صحّة  
جيم : أمّا ما يحبّنيش نعرّس بيها  
هي : شكون بيها  
جيم : هذه  
هي : علاه  
جيم : في سبرنا  
ما ناخذوش البيّض

### واو تخرج

الأم : توّه نقولو للدّكتورة تشوف ليك وصيفة حرّة  
جيم : تتعشّي بحذانا  
الأم : في دار بوك  
هي : شربة ماء تززّي

### قاف تمدّ لها كاس ماء

جيم : ما تشرّيش  
هي : علاه  
جيم : الماء مقصوص  
هي : بالك جابوه من عند الحيران  
جيم : الحيران ما يعطيوهم شيء

الأم : جينا من عند العطار

جيم : العطار ما يعطيكمش

الأم : هاو عطانا

جيم : يعطي كان لبناتك

إذا اعطاوه

الأم : هاو أنا ما عطيته شيء وعطاني

جيم : لازم عطيته

الأم : آش عطيته

جيم : اللّي مستانسة تعطيه

الأم : توة نعطيك اللّي عطيته

معطب على مناخيرك

وقصّة في شواريك

يا وصيف يا مصنان

جيم : يا حطبة يا شايحة

الأم : سكر فمك لا نمرمدك

قدّام الدكورة

الأم تفكّ الكأس للطبيية

تبزّعه على وجه جيم وتخرج

جيم : يا فاسدة

الأم : يا سوفاج

جيم يدور للطبيية

جيم : ريت هالوسط الخامج

يا مدام

أنا كان الوالد يلع

وإن شاء الله على قريب

وتولّي الدزة متاعي

مستعدّ نفرني عليه

نهزّه ونطير بيه  
نون خويا  
على خاطر كان يقعد لهنّا  
Il est foutu

ساء تدخل تترشق  
مبّله محمّرة  
لوبانة في فمها  
وصاك في يدها

ساء : توصلني في ثيتك  
هي : وين ماشية  
ساء : نخدم

واو تدخل

واو : وين

Cours du soir : ساء

Abdallah school : جيم

كي العادة

واو : حلّ الصّاك

ساء تخزر للطبيبة  
تطرشق اللّوبانة  
وتجي خارجة  
قاف من وراء الرّيدو  
تجدد الطبيبة تغيبها  
الأم تتعدّي تجري  
سفسار يها على راسها

الأم : ما نجبّوش يمشي للبحر

واو : حلّ الصّاك

فركسهولها

واو تشير لجيم  
جيم يقرّب لساء  
تحلّ له الصّاك  
يطبّس رأسه  
تحشي له الصّاك في راسه  
وبساقها تروّح له  
طول لمحاشنمه

ظلام  
يهبط الرّيدو الأحمر

# الرهان

الطَّبِيَّةُ قَدَامَ مِيكْرُوها

لاصقَةَ الرِّيدُو

ونون من الشَّيرِه الأخرى

قاعِد على كرسيه

والميكرو وراه

هي : بعد الـcure ضدَّ الـsyphilis

بيان السَّيِّطار

تسكَّرت من جديد عليه وعليها

ماهيش عارفه كيفاش

أما يلزمها تمنَّعه

تخرَّجه من حتميَّة الرِّبَطُ

ومنطق المريض حالة نحكيو عليها

وموش إنسان نحكيو معاه

كيفاش نعاودو

نبنيو شخصيَّة متشتتة

إذا نسكَّتو

نلجِّمو المريض

حسَّت حماسها بدأ يرجع

حماس نساته من وين

خمسطاش سنة لتالي

هي وأصحابها

حلمو بسبيطار يكون مأوى

موش حَبْسُ

حُلْم دام عامين

المؤسسة  
قوانينها وعاداتها من جهة  
تناقضات وقلّة التجربة عند المجموعة  
من جهة أخرى  
خلال الحلم يبدأ يوفى  
أصحابها تفرّقوا  
هجو  
وإلا شدّو الصّف  
ورجع المريض للدواء  
للتخميد  
للسّكات وللنظام

تقدّم بميكروها

وهي  
خمسطاش سنة تُكرّر في شلاكتها  
حتى جاء نون فيّقتها  
ما تعرفش علاه  
نفضت ريشها  
ومدّت له يدها  
يلزمها تواصل اللّي بداته معاه  
رهان قبلته  
مسؤوليّة خذاتها  
مغامرة دخلت فيها  
وماهيش عارفة وين باش تديها





# كلمات

الضوء يتبدل  
هي تدور لنون  
تقدم له

هي : كيفاش صبحت اليوم  
نون : رجعت وحدي للسّيطار

هي : C'est bien  
نون : أمّا ما نحبّش نقعد هوني  
نولي كيفهم

هي : Très bien  
نون : البارح جيت باش نفصع  
وصلت للباب ورجعت

تمشي له  
توقفه وتقدم بيه  
ترجع للكرسي  
تحطه له في بقعته  
نون يسرح  
ترجعه  
تفقه على الكرسي  
تحط له الميكرو قدامه  
تستويله رأسه

هي : كي حبيت تهرب من جديد  
علاه رجعت

نون : على خاطر نخاف  
هي : مناش

نون : قول لجماعتك  
الطبة والفرمليات

وبزاعة القصاري متاعك

هروبي خوف

هي : مناش

نون : خوف لا نهرب

وما عادش يقبلوني

وخوف لا نتحصر هوني

نولّي كيف عبد الله

جثة هايمّة بلا روح

آش يلزمني نعمل

باش نمنع روحي

هي : وإنّ آش تحبّ تعمل

نون : نحبّ نحكي

هي : نسمع فيك

نون : علاه

هي : علاه شنوّة

نون : علاه تسمع فيّ

هي : باش نحاول نفهمك

ونتوصلو جميع لمعرفة أسباب غصرتك

نون : من اللّي صغير حدّ ما سمعني

هي : أنا لهنا باش نسمعك

نون : ثمة برشا شيء نحبّ نقوله

نخرّجه

نحبّ نحكي

نحبّ نخفّ

نمنع

وما إنجمش

تمشي لميكروها

هي : خوذ وقتك

ماناش مزروين

نون : بابا قتل

هي : قتل

نون : قتل

إيديه ملطخة بالدم

والله كيما نقول لك

هي : شكون

نون : ما قالش شكون

أما قتل

هي : وقتاه

نون : في الحرب

هي : أما حرب

نون : ما قالش

عمل الموبقات الكلّ بابا

شلفحنا من بلاد لبلاد

عمري ما استانست بدار

ولا طوّلت مع صغار

مبرّذِلها معانا وفي خدمته

آش كلات من عنده الأمّ

يدخل عليها يسوّطها من غير سبب

ومن بعد يكر كرها لفرشه

وهي تمكّن بيّ

وتحشيني بيناتهم

باش ما يمسهّاش

هي : وانت

نون : تمكنيّ غصرة

من وقتها بديت نهرب من الدّار

نعدي ليالي فوق الشجر  
والأ في فلوكة  
في قاع البحر  
باش يتخلص مني  
رمانى فى الإصلاحية  
بعد شهرين المدير حبّ يسبيني  
لحسن السيرة  
والانضباط التام  
واحترام الأوقات الإدراية  
الرجاء التوجه إلى مكتب الإرشادات  
قبل الساعة الخا  
الخاء خويا فى الحبس

يغيب مدّة

ويرجع

آش كنت نخرّف لك

هى : على بوك

نون : آش بيه

هى : رماك فى الإصلاحية

نون : ياخي

هى : المدير حبّ يسبيك

نون : علاه

هى : لحسن السيرة والانضباط

نون : ما هو قال لهم زيدوه باش يولّي راجل

هى : ووليت

نون : ما ظاهر لي

هى : علاه

نون : الراجل ما يخافش

أنا نخاف

الرّاجل ما ييكيش

أنا نيكى

الرّاجل ما يهربش

أنا نهرب

هي : شكون قال لك

نون : بابا

هي : بوك لا يخاف

لا ييكى لا يهرب

نون : بابا كان يصلّي ويشرب

يرّي ويكذب

ينهي ويعصي

يضرب وييكى

يوعظ ويفسى

يضحك

هي : الخوف والبكاء والهروب

ماهمش مقياس للرجوليّة

نون : شنوّة مقياس الرجوليّة

هي : حسب رأيك

نون : علاه كلّ ما نسألك

ترجّع لي السّؤال

هي : على خاطر رأيي ماهوش هامّ

نون : إمالة أنا راجل

هي : كان ظهر لك راجل

راجل

نون : بما أنّي طلعت أقوى من بابا

تقويّت عليه

سلّمني للإصلاحيّة

سلطة أقوى من سلطته

باش تبرکني وترينني

هي : وترينت

نون : لا

كملت نهرب من الدار

ليل مع نهار

نغيب بالأيامات

من المكتب

موش بخل وإلا بهامة

ذكي برشا راني

أما حاجة في تلزني

باش نشرها للمعلم

نسبه ونهرب

كي نخاف نهرب

من المكتب نهرب

من المعلم

من الدار نهرب

من بابا

من السبيطار

نهرب من الطبيب

حياتي هرروب

برجولية نحب نهرب من روجي

من صغري

من اللي نعرفه وما نخرجوش

ومن اللي في وما نعرفوش

ما أذكاني الزح


الكلام ساعات يخرج من فمي يورور

أفكار واضحة

تحكي على اللي نعاني

على خيبة أحلامي

وسواد آيامي  
أروه على سَعْد آيامي  
نحبّ نقول الكلمة اللّي تلزم  
في الوقت اللّي يلزم  
كيف بابا  
هي : تحبّ تشبه لبوك



نون : لا  
بابا عينيه كحل  
محروقين  
يغرسهم فيّ  
ويقول لي أخزّرلي  
وكيف نخزّرله

يروّح شارب  
يحطّني بحذاه  
ويبدأ يحكي  
يحكي يحكي  
يقطع رَحْلُه آش يعرف يحكي  
يحكي على كلّ شيء  
وأنا مبلّع  
عمره ما سألني على رأيي  
آش نحبّ  
آش نكره  
ماهوش داخل لطاسة مخّه  
اللّي كلّ واحد عنده رأي  
وعنده الحقّ يقوله  
يعبرّ عليه

بيشّنج

الفرخ اللّي تضمّ له فمّه  
كيف يكبر يطلع يخاف  
ما عندوش ثقة في روجه  
على هذاكة توة نحبّ نتكلّم  
نحكي كيف ما جاء جاء  
لا نزيّن  
لا نلوّن  
نحبّ نحكي  
نداوي  
نعيش

بيكي

هذا قراري  
وما ثمة كان إنت تنجّم تعاوني  
عاوني



نعرف الكلمة تدمغ  
الكلمة عندها قوّة خارقة للعادة  
قوّة جبّارة  
الكلمة أقوى من العصا

يشهق ويبكي

هي :

قل لِمَنْ هَمَّهَمَ فِي النَّاسِ وَخَافَ الْكَلِمَاتِ  
أَوْ تَخَشَى النَّاسَ وَالْحَقَّ سَجِينِ الْكَلِمَاتِ  
أَوْ تَخَشَى النَّاسَ وَالْحَقَّ رَهِينِ الْكَلِمَاتِ  
حَيَوَانَ أَنْتِ لَا تَفْقَهُ لَوْلَا الْكَلِمَاتِ  
وَنَبَاتٍ أَوْ جَمَادٍ أَنْتِ لَوْلَا الْكَلِمَاتِ  
مَا الَّذِي تَرْجُوهُ مِنْ دُنْيَاكَ لَوْلَا الْكَلِمَاتِ  
أَنْتِ إِنْسَانٌ لَدَى النَّاسِ رَسُولُ الْكَلِمَاتِ  
فَتَكَلَّمِي، وَتَأَلَّمِي وَتَمَتِّي فِي الْكَلِمَاتِ

منور صمادح

مستشفى الرّازي 2 ديسمبر 1969

ظلام

# خروج الخو من الحبس

يطلع الریدو الأحمر

الأمّ تقدّم لولدها

تشده وتخرجه



تخزر للطبيبة

يطلع الریدو 1 للشطر

يتفرجو فيه ومنها يغيبو

تدخل واو بكرسي

تحطه وتقعده


يدخل بعدها جيم ياصقها

يرمي يده تتخياها له وتبعد

تدخل ساء تحط كرسيها وتقعده

جيم يقدم لواو يرمي يده

تَلطِّخُهَا لَهُ وَتُخْرِجُ  
يَقْرَبُ لِسَاءَ يَرْمِي يَدَهُ  
تَشْحَطُهُ  
يُخْرِجُ وَيُخْلِئُهَا  
مَدَّةً وَيَرْجِعُ خَالِطَ وِرَاءِ وَاوٍ  
وَبَيْنَ تَمَشِي هُوَ وِرَاءَهَا  
قَافٍ تَدْخُلُ بَكْرَسِي تُخْرِجُ بِزُرُوزٍ



تَنْظَمُ وَتَرْتَبُ  
تَدْخُلُ الْأَمَّ تَكَرَّرُ فِي نَوْنٍ  
يَطْلُعُ الرَّيْدُو 1  
لَعِبَةُ الْكِرَاسِي تَتَوَاصَلُ  
كَلَّ وَاحِدٍ يَحِبُّ يَقْعُدُ وَحْدَهُ  
وَحَدًّا مَا لَاقِي بِقَعَّةٍ تَرْتَحَهُ

مرّة إثنين

عشرة



الكراسي تتخبّل  
كلّ واحد هارب من الآخر  
والأمّ داخلة خارجة  
تطوي في سفساري  
تنفض في المخادد  
تفطر في نون  
نون يشدّ قاف يتعنف عليها  
العائلة تخوض  
تهرب كراسيها  
جيم يحاول يمنع قاف  
يحصر نون  
بدخول خاء  
صاك على ظهره  
يصيح

خاء : سيّبه

سيّبه

نون يصيح

نون : علاه رجعت

علاه رجعت

ويهرب يجري

ظلام

## السِّيخَة

روز ميكروات بحذا بعضهم

ونون ملوَح

محرمه على رأسه

تدخل الطَّبِيبة

تأقف قدام الميكرو 1

هي : كيف العادة

بعد ما وعد يجيها

ويحكى معاها

تعذّي شهر كامل ما راتوش

تحيرت

هزّت التّاليفون

حبّت تسأل عليه

جاوبتها أخته ساء

تدخل ساء

تأقف قدام الميكرو 3

ساء : قالت لها نون بات ما صبح

ليه ثلاثة أيام غايب

وحدّ ما يدري عليه وين

هي : خبرتو عليه

ساء : ما عنده وين يمشي

يسرح ويرجع

هي : ما كمش متحيرين

ساء : وعلاه نتحيرو

مستانس يفصع من اللّي صغير

كانك عليّ أنا نخيره بعيد

وإذا جاك شدّيه

هي : السّيطار خير

ساء : السّيطار أضمن

هي : صارت حاجة في الدّار

ساء : الخاء

هي : الخاء

ساء : الخاء خويا خرج من الحبس

وخايفين لا يخربقها

يخمّج الخبرة ويخليها

ساء تخرج

هي : الخو رجع للدّار

ونون هرب منها

بعد ثلاثة أيام

فقدوه

فركسو عليه

لقاووه

ملوّح في سبخة

الملح مهريه

والشمس تقلبي فيه

هي تخرج

وجيم يقدم لنون

جيم : نّو

نّو

نّو

وينك نلّوج عليك

فجعتنا

آش تعمل وحدك

نون يتقعد

سارح غايب

نون : مانيش وحدي

صباح الخير

جيم : الأربعة متاع العشيّة

صباح الخير

بارك في سيخة

في وسط العفن

والذبان يقنقن عليك

نون : سرحت

جيم : في مصبّ زبلّة

نون : في مخّي

جيم : أنخرلي

نون راشق عينيه لفقوق

نون : هاني نخزرلك

جيم : أنخرلي في عينيا

ما تحقرنيش

نون يخزر قدامه

نون : هاني نرى فيك

جيم : ثلاثة أيام ما روحتش

نون : ثلاثة أيام

جيم : ما فقتش بالوقت

نون : الوقت

آش معنتها

جيم : آش عملت في هالثلاثة أيام

نون : تمدّيت

خلّيت بدني يسيل

وفكري يطير

جيم : لوين



سود : الفوق

بعيد على الخلق  
يرى فيهم كي النّمال  
متكاثرين  
متخالفين  
متكالبين  
متخائفين  
متناكحين  
وهو بعيد

جيم : شكون

نون : مخّي

جيم : آش كليت هالثلاثة آيام

نون : مخّي

جيم : آش كليت

نون : كليت النّجوم بنورها

والقمر ببجورها

تعرف لون السّماء

جيم : أزرق كيف تبدأ صافية

أسود كي خليقتي

كيف تبدأ طافية

نون : أعمى

أعمى كيفهم

الفجر بُهرة طالعة

الصّبح زُرقة ساطعة

الظّهر نار لاهبة

الغروب فضّة لامعة

جيم : واللّيل فحمة حالكة

الخاء يسأل عليك

نون : شكون خاء

جيم : خوك

نون : ما نعرفوش

جيم : عامل حفلة

بمناسبة خروجه من الحبس  
ويحبك تكون موجود

نون يشير له

بصبغه

نون : آش نوة هذاكة

جيم : شنوة

نون : اللّي خارج من سروالك يدلّدل  
نحيه

آهوك هابط من وذنك

جيم يمشي لنون

يحبّ يكركره



يزيني من الـpsychose متاعك

قوم

ما نحملش نراك هكّة

نون يضرب جيم

ويصيح

يدخل خاء

نون : سَيِّئِي  
نَحْيِ الدَّوْدَ اللَّيِّ فِي وَذْنِيكَ  
خاء : سَيِّئِهِ

يصيح

قلت لك سَيِّئِهِ

جيم يطبع

يوخر

يغيب

الْخَاءُ يَقْدَمُ

خاء : عَقَلْتَنِي

نون : بَابَا

لاباس

خاء : كُنْتُ فِي الْحَبْسِ

مَوْشَ فِي الْجَبَانَةِ

نون : أَنَا خَرَجْتُ مِنَ السَّيِّطَارِ

خاء : السَّيِّطَارِ مَوْشَ خَيْرِ

نون : وَالْحَبْسِ مَوْشَ خَيْرِ

خاء : عَلَاهُ خَرَجْتُ مِنَ السَّيِّطَارِ

نون : بَرِيْتُ

وإنت

خاء : هَيَّا نَحْكِيو فِي الْكَرْهِيَةِ

نون : عَلَاهُ مَا طَلَيْتَشَ عَلَيَّ

خاء : ضَيَّعْتُ الْأَدْرِيسَةَ

نون : تَعَدَّيْنَاكَ

حاء : إنت وشكون

نون : أنا والصّوت

حاء : وين

نون : تعرّضولنا في الباب

قالو لنا ليل

راقدا

أرجعو له غدوة

شفناك في البيت

متّكي

والحمام الأكلحل ينقر لك في عينيك

وانت سارح

مخّك مرشوق في السّقف

تخمّم فيه

لاباس عليه

حاء : شكون

نون : متوحّشك ولدك

باعث لك السّلام من ألمانيا

ومرتك زادة

يا خاء

يا ولد الشّاء

تبدّلت

حاء : كيفاه

نون : خييت ورزنت

كلّك بوك يحرق بوك

حاء : هيّا قوم روّح

نون : داري هوني

حاء : يلزمني نتلهي بيك

نطلّعك معايا لألمانيا

نردّك راجل

خدمة ومرا

نون : المرا شيطان

خليها ليك

خاء : هيّا نحكيو في هالموضوع في الكرهبة

نون : وأصحابي

خاء : شكونهم أصحابك

نون : اللّي بين ساقيك

خاء : نرجعولهم وقت آخر

نون : ردّ بالك لا تعفسهم

خاء : ما تخافش عليهم

أصحابك أصحابي

يلزمك تروّح

نون : داري هوني

خاء : ما ياكلش الطريّح هذا معايا

كانك مهبول

أنا مهبول أكثر منك

يشير لجيم

هزه للكرهبة

جيم يخطف نون

يكركره

يغيبو في وسط الرّيدو 2

نون يصيح ويفركح

نون : داري هوني

داري هوني

نقعد هوني

سيّوني

ما نحبّش نروّح

يهبط الرّيدو 1

تدخل الطّبيبة

تدخل واو وراها

ياقفو قدام الميكروبات 1 و3

هي : رَوْح

واو : رَوْح بيه الخاء

وجاب له مومس للدّار

قال له ورّيهـا رجوليتك

فركح

صاح

سكّر عليهم باب

وحطّ المسجّلة على الآخر

هي : وعلاه عامل معاه هكّة

واو : من اللّي مات الشّايب

الحاء قيم فيها الآذان

كملت مرته القاورية فصعت عليه

وهربت له بولده

فشّ غيظه في نون

مقرّد عليه

ينحّي له سرّوالة قدام الرّجال

يحبّ يشطّحه

يصبّ عليه سطل ماء بارد

يخبّي له حوايجه

وكيف نون يتنرفز ويهيج

يضرّبه

هي : وإنتوما وينكم

واو : أحنا

الدّاخـل بشلبوق

والخارج بعنقيّة

سكّرته تبدأ من القايلة  
الكودية سايلة  
الزّطلة كاينه  
والفرزيط يشرفع  
بيت على ذمته  
والأصحاب داخله خارجه  
أنائي وذكورة  
وأحنا نسريو  
نشطحو نغنيو  
ونعريو

هي : علاه ترَبَط في الحبس خوك

واو : بغاء سرّي

ترويج واستهلاك مخدّرات  
وبرشا موبقات أخرى

واو تهزّ الميكرو 3 وتخرج

هي : ثلاثة أيام من بعد

الفرملي فيقها

السّعة متاع الصّباح

قال لها نون عمل زبلة في الدّار

زدمو الجّيران

عيطو للبوليسيّة

كر كروه

تخرّج ميكروها وتغيب

ظلام

# الشنط

يطلع الرّيدو 1

يظهر الخاء واقف

لابس مايو

يطلع الرّيدو 2

يظهرو الأخرين

ساء واو قاف وجيم

الكلّ بالمايوات

إلا جيم بكسوة

يتسمع صوت نون من بعيد

يبكي

معاه الطبيبة

في السّبطار

قاف تفرش فوطه على الشنط

بجنب خاء

الكلّ يقعدو لاصقين بعضهم

يتسّقرو

كأنهم يسمعو في نون

هي : آش بيه وجهك مدمدم

آش صار البارح في اللّيل

علاه ما طلبتنيش

الطّيب ما حبّش يصحّح على دخولك

قال ماكش

نون يقاطعها

نون : يعرف حالتي خير منك

هي : في حالات إيه

نون : إنت عندك دوسيّ



إنت تعرفني

هى : أنا ما عندي حتّى سلطة

نون : إنت تقررّ

وقول للطّيب ما عايش يتداخل

في الدّاخِل متاعي

نحبّ نقعد هوني

هى : لا الطّيب

لا أنا

انجمو نخليوك

إذا حالتك ما تطلبش دخولك للسّيطار

يلزمك تروّح

نون : لا

هى : آش صار البارح في اللّيل

علاه ما تحبّش تحكي لي

واو تاقف

تهزّ دبشها

وتخرج

جيم يخلط عليها

الأخرين يتحرّكو

يقدمو أكثر للماء

صوت نون يواصل

نون : ما نحبّش نروّح

هى : السّيطار خير

نون : السّيطار موش خير

والدّار موش خير

هى : وين تحسّ روحك خير

نون : الفوق

أمبولة طايرة

كي تغيب على العينين ينساوها  
وكي تطيح وتفلق  
يتفجعو

هي : شكونهم

نون : الكلّ

هي : شكونهم الكلّ

نون : هوما

هي : سمّهم

نون : الناس

العباد

البشر

ساكت يقولو بهلول

نتكلم يقولو بهتري

نرقد يقولو مخدّر

نكسرّ يقولو مهبول

واو ترجع

جيم في جرتها

الكلّ يجملو في بقعتهم

يسمعو



هي : وإنت اش تقول

نون : أنا نقول

نون تغلبه البكية

سكاتي كلام مسطر  
كلامي صياح مصدع  
وهروبي خوف مفضح

ساء تنزع الشورط

وتقدم

الخاء يقعد على الحرف

جيم ينزع الكسوة

ويعمل حركات رياضية

فأف تتلعوك

ومنها تقرب للحرف

هي : شكون ضربك نون

شكون ضربك

نون : الكلهم وجعوني

هي : شكونهم الكل

أمك

أخوتك

نون : هو ضرب

وهوما سكتو

هي : شكون هو

نون : ولدها

هي : علاه ضربك

نون : وعلاه ما يضربنيش

الكلهم يتبلحطو

التراب يحرق

والشمس تعمي

هي : وعلاه ما تدافعش على روحك

نون : وآش نيّ روحي

أنا شكون

أنا شنوّه

أنا قدّاش

في المكتب يقولو

واحد وواحد يجيو اثنين

وأنا عندي

واحد وواحد يساوي واحد

أنا شكون

هي : إنت نون

نون : نون شيء

حتى شيء

نون ضربه

وفي السّبيطار لوّحوه

هي : علاه

نون : باش الخو للحبس ما يرجّعوه

هي : الخو

نون : روّح سكران

وخلّط بالنفّة

أعطاهم طريحة

فشّخهم

كسّر التّلفزة

وحاك الأم بكفّ

وهي خافت عليه

لا البوليسيّة يكرفظوه

شارت بصبعها وقالت

نون مهبول هزوّه

هو مولى العملة

واو تقوم  
تلم قسنتها وتجيء خارجة  
خاء يصفر لها



خاء : لوين  
واو : تحرقت  
نحب نروح  
خاء : اغطسي توة تبردي  
واو : ماء البحر ما يبرد ليش ناراي  
ساء : رشي عليها الرمل  
واو : بلعي فمك  
خاء : قول لها لوين  
جيم : قال لك لوين  
واو : مروحة  
خاء : قول لها شاورتي  
جيم : ماو شاور الزح  
واو : ضم بخرتك  
مانيش طرشة

سمعته

وما عندي شكون نشاور

خاء : جيها

جيم : صليو عالتي الزح

جينا باش نتفهدو

ونخمحو أمها

خاء : جيها لا نمرمدك

يطروش بيده

جيم يتنطر

ياقف قدام واو

جيم : قال لك أقعد معانا

أقعد معانا

واو : آش يهم أصل بوك

جيم : حتى تقولي وين ماشية

واو : نهمل

جيم : نمشي معاك

واو : تمشي غبرة في السماء

جيم : خوك وصاني

واو : ضمير

جيم : وين ماشية

ساء : أنا نعرف

تحب تعمل تليفون للطبيبة

تسأل على نون

وتحكي لها باللي صار

خاء : تحبي تحكي مع الطبيبة

واو : نحب ندوش و نرقد

الشمس حيرت لي الشقيقة

ساء : تكذب

البارح عملت تاليفون للسّيطار

ما لقاتش الطّيبية

طلبت نومروها

ما حبّوش يعطيوهولها

واو : إنت يا عافنة

سكّري جلغتك

ولمّي أفحاذك لا يلهبولك

خاء : علاه طلبتي السّيطار

واو : نسأل على نون

خاء : وآش قالولك

واو : قالولي إسأل الطّيب

خاء : والطّيب آش قال

واو : ما لقيتوش

خاء : متحيرة على خوك

واو : Normal خويا

خاء : واحنا ماناش متحيرين عليه

واو : كانكم متحيرين

راكم ما كذبتوش عليه

خاء : أحنا كذبنا عليه

واو : ليلتها ما عمل شيء

خاء : وشكون عمل

واو : إنت تعرف

خاء : تخيريني نرجع وين كنت

واو : ما نخير شيء

ما نحبّش نون يرجع للسّيطار

خاء : السّيطار موش خير للمهبلّة

واو : نون موش مهبول

إتوما تهبلو فيه

ساء : يضر بنا

واو : كيف تجبدوه

ساء : يغوث يرعينا

عقابات الليالي

واو : ما سمعتش صوتك

كيف تبدي تبرّحي

الشقيقة مكنتني منك

ساء : والسكاكن اللّي يخبّي فيهم

حتى نهار يذبح وحدة منا

واو : كان باش يذبح

راهو ذبح

ساء : والشّوه مع الجيران

واو : والبلعة للصباح

والزّطلة والنساء

والحبوسات

ساقيكم في الغرم

وتأذّنو

خاء يتطرّ ياقف

خاء : إيجا

يتلّفت لجيم

جيبها

واو : يحطّ عليّ يدّه نكسرّها

الأمّ تدخل

ميكروفي يدها

يدورولها الكلّ



يخزرونها  
خاء يبدل اللهجة

خاء : عندك الحقّ

نون خونا ونحبّوه  
وعمرنا ما نلوّحوه  
غدوة نخرّجوه

يتبسّم

النّاس الكلّ في البحر

الضّوء يتبدّل  
يولّي خافت



# الخاء وليدي

الأمّ تافف قدام الميكرو  
وترتل

الأمّ : الخاء

الخاء وليدي كي الهندي  
القشرة بالشوك  
القلب مفلوق  
والجاش مشوشط محروق  
الخاء وليدي يحسّ  
حسّه حسّ على حسّ  
حسّه ما قياسه حسّ  
وحسّي عليه ما كيفه حسّ  
حسنا نفس الحسّ  
وليدي كييدي  
الخاء وليدي  
الخاء وليدي حسّاس  
دسّاس  
دحناس  
حسّ  
جسّ  
تكبسّ  
تمسّ  
تلمسّ  
يبسّ  
كليسّ  
حسّ وحسّ  
وحسّ الحسّاد إزداد  
ولّا غدّاد شدّاد

جَاب لَهُ النَكَاد  
رِصَاتٍ لَهُ يَهْدُ وَيَسِدُّ  
يَقْدُ وَيِرْدُ  
لَيْنٌ فَدٌّ وَتَهْدٌ  
تَهْدٌ وَتَخْنُقُ  
تَفْلُقُ  
حَبِيبِي كَبِيدِي  
الْخَاءُ وَلِيدِي  
الْخَاءُ وَلِيدِي مُحْسُوسُ  
مِنْفُوسُ  
دَارُو بِهِ الزَّنُوسُ  
سَلْبُولُهُ فُلُوسٌ عَلَى فُلُوسٍ  
حِظُّهُ مَتَعُوسُ  
مِنْحُوسُ  
دَمُّهُ مِمَّصُوسُ  
كَلَامُهُ مَلْمُوسُ  
مَفْحُوسُ  
فِي الْحَبْسِ مُحْبُوسُ  
مُحْسُوسُ  
مُحْمُوسُ

الطَّبِيبِيَّةُ تَدْخُلُ

تَقْدَمُ

تَأْقَفُ

تَسْمَعُ فِي الْأَمِّ

الْخَاءُ وَلِيدِي

مُحْمُوسُ

مِنْ الْمَوْمَسِ مَرْتُهُ

الْكَبِيدَةُ شُوتٌ لَهُ

وَبُولِيدُهُ هَرَبْتُ لَهُ

عِدْرَاتُهُ

خَانَاتُهُ

طَحَنَاتِهِ

شَرَدَاتِهِ

نَكَدَاتِهِ

مَعْسَاتِهِ

نَشَّاتِهِ

هَشَّاتِهِ

نَكَبَاتِهِ

وَجَعَاتِهِ

هَرَسَاتِهِ

بِرَكَاتِهِ

لِرَّاتِهِ

دِرَّاتِهِ لِلدَّيْكِ وَهَبَّطَاتِهِ

وَلِيْدِي كِيْدِي

الْخَاءِ وَلِيْدِي

الْحَبْسِ لِلرَّجَالِ

خَيْرٍ مِنَ الْهَبَالِ

دَلَالِ

لِلْعَقْلِ وَكَّالِ

لَا يَفِيْدُ فِيهِ مَالِ

وَلَا أَوْلَادِ الْحَلَالِ

الْهَبَالِ كِبَّالِ

حَلَّالِ مَلَّالِ

موسيقى تطلع

سَيَّالِ

مَيَّالِ

مَعْلَالِ

الموسيقى تغطي صوت الأم

فلأل  
خلأل  
بلأل  
علأل  
دلأل  
وكلأل

الضوء يتبدل  
يخرجو يترأقسو  
ظلام

# المرا هي الداء

يشعل الضوء  
نون يدخل  
رأسه يكركر فيه  
في يده باكو نوار بلاستيك  
يتهزّ ويتنفّض  
تدخل الطبيبة  
تأقف قدام الميكرو  
تخرج أصوات غريبة  
توسويس  
تشريق  
تبسيس  
نون رأسه يهيج  
يعكش  
يكركر الطاولة القدام  
لحظة هي تغيب  
وترجع بكرسي  
تهزّ الميكرو وتقعّد بحذاء  
الريّو 2 يهبط

هي : ca va

نون : Très trop bien

تشير للنوار

هي : Plastique

نون : Bien sûr

هي : J'adore

نون : بلا شك  
ويدوم الدهر

هي : حجّمت شعرك

صحّة

نون : راسي ثقل عليّ

هزّيته لنبيل الحجّام

صاحبي

يقرقطهولي

باش يخفّ

ياخي زاد ثقل

وانت صبغت

هي : باش نغطيّ الشيب ما تشلقش

ريت الطّقس

يهبّل

السّماء صافية

البحر زيت

النّاس شايخة

والعصافير تُرَقِرُقُ

تاكل مريح

نون : وانت تاعبة

هي : نخدم برشا

نون : أنا وليت نخدم في الجامع

نعاون عمّ أحمد

نطلّع له دبّوزة الماء

ننفض الحصر

وننظّف الميضة

من اللّي وليت نخدم في الجامع

ولّي يُبرق

زادوني ألفين

يسكت

يغيب مع روحه ويرجع



البارح وأنا في الكوجية  
نسخن في الكسكسي  
يدّي بطرطوشة السكينة  
من غير ما نشعر  
صوّرت على الحيط

راسه يهزّه  
يجري يصوّر في الهواء  
شكل غامض

آش نية هذه

هي : شجرة

نون : لا

طلّع

هي : دار

نون : زيد طلّع

هي : فلوكة

راسه يرجعه للطاولة

يكركره

يتلطنخ



نون : البارح وأنا نسخن في الكسكسي

يدّي بطرطوشة السكينة

من غير ما نشعر على الحيط

صوّرت وجه مرا

بالعينين

بالفمّ

بالحواجب

بالبازل

مشكلتي المرا

ما كانش علاش نصوّر وجه مرا

موش قطّوسة

موش فيل

يتغصّر

قرّد

زرزوميّة

يصيح

قلت لك مشكلتي المرا

أنا أهوكة نسييت ما قتللكش

اللي نكره النساء من أصلي

بابا علّمني

المرا رجسّ من عمّل الشّيطان

إذا تخرج معاها تسربي هولك

بمكّيك

يعبدك

يسكن فيك

يهتّكك

نون يهبط تحت الطاولة

هي تتبعه بالميكرو

ما سمعتش كلام بابا

خرجت مع مرا

رَبِّي عاقبني  
مرّضني بالـsyphilis  
وتوّء سامحني  
كنت في وسط حلقة  
زرداب  
وبيان دائرة بيّ

نون يرجع يجمع يتوجّع  
وهي تحاول تخلي الميكرو  
ديما قدّام فمه

بيان مسكّرة  
مبلّجة  
مسلسلة  
وأنا مطبّس  
ملوي على إثنين

نون متشنج  
يتوجّع  
يعيط  
يتصعصع  
يعكش

شكارة رصاص على كرايمي  
كيما حمّا  
حمّا ما  
حمّا ما لة الحطّيب  
نحبّ نكسر السلاسل  
ونهبّ الشكاير  
شكاير الرصاص  
الرصاص اللّي مرزّني  
مضعفني  
ميركني  
ما إنجمش  
ما نجم

يععم

ما نجّمتمش  
ما خلّاتنيش نكون أنا  
ما عادش نعرف أنا شكون  
ما عادش إنجمّ نرقد  
ناكل

نشرّب كي الناس  
قسّميتي في زوز  
بدني ما عادش بدني  
ما نُحمكش  
ما نُكحمش

هي : ما نحكمش

نون : ما نحكمش فيه

نون بطيح

يحبو على أربعة ساقين

واليوم هبّطت الشّكارة خفّيت  
ريت باب تشقّق  
وتحلّت قدامي ثنيّة  
ريتك إنت فيها

يتعنكش فيها

ياقف

ياخذ لها الميكرو

الحمد لله يا ربّي

الحمد لله يا ربّي

نحمدك

نحمدك ونشكرك

يطلع الرّيدو 2

الخاء وجيم يظهر و لتالي

يعسو

نحسّ في راحة سماوية

ما تتحكّاش  
إِيَّاهُ  
إِيَّاهُ  
إِجَابَا نُبُوسِكْ

نُونِ يَنْكَا عَلَيْهَا

يَغِيْبُ

هِيَ تَسَلُّ رُوحَهَا وَتَبْعُدُ

مَهْلَةً

يَفِيْقُ

وِينِكْ

وِينِكْ يَا رَبِّي

رَبِّي غَفِرْ لِي وَسَامِحْنِي

إِيَّاهُ

أَشْ خَيْرٌ مِنْ غَفْرَانِ رَبِّي وَسَمَاحِهِ

مَنْعَنِي مِنَ السَّبِيْطَارِ

هِيَ تَسْكُرُ الْكِرَاسِي

تَحْطُمُ عَلَى الطَّوَالَةِ

تُوَخِّرُهُمْ

وَتَقْدَمُ لَهُ

النُّوَارَ فِي يَدِهَا

وَالدَّوَاءَ الْعَقَّارِ

العصفور طار

والعقرب في الغار

تَوْءَةٌ نَحْبٌ نَنْشُرُ الدِّينَ وَالْإِيمَانَ

وَنَهْدِي الْجَمِيعَ لِلصِّرَاطِ الْمُسْتَقِيمِ

اللَّيِّ هِدَانِي لِيهِ سُبْحَانَهُ

وَنَشْكُرُهُ اللَّيِّ بَعَثَكَ لِيَّ

نِعْمَةٌ

عَاوَنْتِي

خَلَيْتَنِي نَتَكَلَّمُ نَتَكَلَّمُ

نَتَكَلَّمُ

يقطع رحلي آس وليت نبرلي  
نحس في روعي خير بيرشا  
حتى الصوت اللي عابدي  
وليت نحكي معاه  
نهنتل فيه  
نعطيه موعد ونفصع  
يقول لي ميسالش  
ما نأخذش عليك  
ولّي هو على روحه  
وأنا على روعي  
وين كنت وين صبحت

سكات

هي : والنساء  
نون : آس بيهم النساء  
هي : ما عادش يخوفوك  
نون : أنا ما قتلتكش  
اليوم كلمت مرا  
هي : آس قلت لها  
نون : قدّاش الوقت

يسكت مهلة  
يغيب ويرجع

بارك الله فيك  
عاونتني  
توة إنجم نظير  
نحلّق بجوانحي  
كان يعيطو لي اليوم للقدس  
ورأس أمّي نجيبها  
ما عادش نستحقك  
بارك الله فيك

سامحني  
عندي ما نعمل

يمدّ يده للسلام ويفصع  
ياخذ النوار  
يرجّلها الميكرو  
يجي خارج يشوف خاء وجيم  
يهول مزروب  
يهبط الرّيدو الأحمر قدامه  
الطبيبة تدور للقاعة

هي : قال لها

مشكلتي المرا  
أما أنا مرا  
المرا اللّي مقابلته  
أمه  
أخوته  
هي  
وإلا المرا اللّي فيه  
توة مده بدأ يحكي لها على صاحبه  
الصياد  
وسكت  
قال لها ثمة برشا شيء  
ما إنجمش نحكي لك عليه

تسكت مهلة  
تتبسم

كيف نعرفو  
عقدة الأنوثة عند الرّاجل  
في حضارتنا  
نفهمو خوف نون وغصرتّه

ظلام

# ما صاب تموت ورتاح

يطلع الرّيدو 1  
طاولة وكراسي  
والعائلة ملمومة  
خاء يرمي سورّية لساء  
تاخذها وتخرج  
تدخل قاف أصحنة في يدها  
تمسح وتفرّق  
الأمّ رافضة تتعشى  
يدخل نون يلّم الأصحنة  
ويرمي واحد على خاء  
خاء يطيح  
ياقف  
يلّم الأصحنة  
يخطف واحد  
يهذهم بيه  
يتفجعو  
يقعد  
يقعدو  
مهلة  
نون يجمع في بقعته

نون : أمّي

يامّي

أمّي

الأمّ : قولي له أنبح

واو : سكّتي حسّك

نون : أنا قلت لك

ما صاب تموت ورتاح



ما تجاوبوش  
يدفر أخته

قول لها

أنا قلت لها

ما صاب تموت ونرتاح

واو : جاوييه

نون : ما صاب تموت ونرتاح سببة

الأم : لا

دعوة خير

نون : الموت خايبة هي

الموت راحة

نعمة

من اللي نتولدو

نبداو

نوفاو

الدنيا خيط ما بين نكتة ونكتة

المشكلة الكل في النكتة

أنا قلت ما صاب نموت

نموت

الموت

نكتة كحلة

اللي تحبه قول له

ما صاب تموت

قول لي

ما صابك تموت ونرتاح

الأم : ما صابك تموت

نون : قول لي ما نتغشش


الأم : ما صابك تموت ونرتاح

نون : قول  
قول ما نتغشش  
الأم : ما صابك تموت  
ونرتاحو الكلّ

سكتة  
الأم تقوم تخرج

خاء : علاه سبيتها  
نون : ما سبيتهاش  
خاء : سبيتها  
نون : ما سبيتهاش  
خاء : الأم ما تتسبش

خاء يخلط على الأم  
نون يخرج  
وجيم يتبعه  
قاف تعاود تفرق الأصحنة  
خاء يرجع بالأم  
هازها في حملته  
يرصتها على كرسياها



وجيم يرجع بنون

نون يقعد

يججع

نون : ما سببتكش

الأم : سببتي

نون : نون ما يسبب الأم

الأم : سببها

نون : أنا لا

هو يمكن

الأم : شكون هو

نون : الآخر

الأم تشير لخاص

الأم : هو ما يسببش

عمره ما سببني

نون : منين تعرفه

تسمع فيه كيفي

يسكن معاك هو زاده

الأم : يسكن معايا

داره هذه

وما عاdash تقول له الآخر

عنده اسم

نون يتفرعس

نون : ما نحكيش على الآخر متاعك

نحكي على الآخر متاعي أنا

الآخر اللي معايا

اللي يقول لي أعمل وما تعملش

هو اللي قال

ما صابك تموت ورتاح

صوته يتبدل

موش أنا  
هو  
ما تحبش تفهمني  
ما نحكمش في روعي  
مقسوم في زوز  
مشطر  
مفرك  
يد  
ساق  
صوت  
حدّ ما يسمعي

صوته يتبدل ضعيف


أمي سامحه على خاطري  
ما عادش نخليه  
ما عادش يعاود

صوته يتقلب من جديد  
يهذد بالصحن

يا حطبة  
يا شايحة

يغيب  
جيم يرتضهم  
يسلّ له الأصحنة  
ويقعد  
مهلة  
نون يفيق  
يخطف الأصحنة  
ويعلن الحرب على خوه  
أصحنة وأصحاف تتطاير  
تتكسر  
تتبعر على كبر الدار

يلوّح كلّ شيء ويخرج  
جيم يخلط عليه  
البنات تلمّ الماعون  
وتعاود تنصب الطّاوله  
يتلمّو مرّة أخرى  
الأم تهزّ السّوبيرية  
وبالغصّوبة تشرّبها الكلّ  
وتخرج



نون يحبّ يخلط عليها  
خاء يمنعه  
يتعاركو  
صياح وعباط  
البنات تحزّ  
لين ترجع الأمّ  
تقعد  
يقعدو  
نون يعاود

نون : أمّي  
يامّي  
يا الأمّ

الأم : لاني أمك  
ولاك وليدي  
الخاء سيدك وليدي  
قايم بيّ وبيك

نون : يضرب ويصيح  
يدخل في فلوس الحرام  
وتزيد تعطيه متاع البو

الأم : واشي متاع البو  
نون : عطيته متاع البو  
الأم : متاع البو في القبر  
نون : ربتها

عطيته متاع البو  
منقالة بابا

الأم : بوه هو ثانة  
نون : أنا طلبتها منك

ما عطيتيش  
هو ما طلبش عطيته  
علاش هو ياخذها  
وأنا لا

القوة تجيب  
البو بابا أنا ثانة  
كي مات مات عليّ أنا

الأم : وعليّ أنا ثانة  
نون : بابا أنا

مات عليّ نا  
كان يحبني أنا  
يقعد معايا أنا  
يحكي ليّ أنا

يسكر قدامي أنا  
يكي لي ليا أنا  
يشكي لي ليا أنا  
كان يشدك قدامي أنا  
يا أمّ  
يا همّ

صوته يتبدل

إنت كيف تموت وتقضى  
خلي خراصك للخاء  
يا خراء  
خليه زروصك وشعراتك زادة  
وبنوارك  
أقضى موت  
موت وخليه اللي تحبّ

الأم : وإنت

يدك تنقص  
والمنقالة ما تلكهاش

نون يترمي على الطاولة  
يصيح ويغوّث

نون : يا مرا

يا مرا

يا أنثى

يا همّ

يطيح يتصكك

يا دمّ

يا سمّ

يا غمّ

تموت

تجزّر ظروف

يا شيطان

ندخل الطَّبِيَّةَ

تلقاه في القَعَة

مهلة

نون يسكت يخنس

هي : آش ييه

الأم : وَقِيلَ هبل

هي : نون

لاباس

نون يحقرها

يقوم ويتوجّه للخروج

يتمسخر

نون : خذيت دواك

ترقد مليح هالأيامات

الفرملي عجبك

تحكي لي حلمتك

خوك ما زال مقلّك

مشيت للجامع

يغيب

صحّة المريول

باقي تصلّي

طهّرت قدّاش عمرك

صوابع ساقيك مستويين

وذنيك مسرّحين

الصياد صاحبك

الشّمس في بقعتها

البحر يهبل

حسن باب الدّار

يتلّطخ

سكات

هي : آش صار



الأم : ريته آش عامل فينا في الدار  
واو : جمعة يخبّي في السكاكن  
ساء : زعمة خايف علينا  
وعلى الصغار  
عامل هاجت عليه الحملة  
صوت يحكم في يده  
ويدّ متمكّنه به

واو وقاف  
يلمّو الطّواول  
والكراسي

واو : نون يحبّنا ويخاف علينا  
ما يحبّش يضرّنا  
يلزمه يفصع  
يحرق لإيطاليا  
وإلاّ لجهنّم  
يهجّ  
ويرتاح منكم  
لو كان تهزّ الخاء تداويه خير  
هي : علاه

جيم : فكّ له منقالة عم العاء  
الأم : ما فكّوش  
أنا عطيتها له

وتدور للطّبيية

وانت وينك ها للاً الشابة  
نسيته

واو وقاف  
يخرّجو الكراسي والطّواول

ساء : قلبك ما حرقكش عليه  
الأم : ما عادش تحبّيه

هزّيه

ساء : خوذيّه

داويه

توّه يفرهد عليك

وإلاّ بالك ما ترضيش بيه

الأم : كيفاش ما ترضاش بيه

وليدي شباب وصغير

وهي مكّهبة على الخمسين

واشي تولديه

الخاء يظهر

ياقف وراء أمّه

خاء : هكّة

تجيه حتّى لهنّا

ويطفّيك

ما يعرفش قيمتك

يرى مرا يتسبغ

هى : الكلام موش بالسّيف

يلزمه يكون مستعدّ

خاء : هاني نا مستعدّ

عندي برشا مشاكل

هى : نفسائيّة

ساء : جدّا

هى : إيجاني للسّيطار

توّه نتهلى بيك

خاء : هاو نون تجيه للدّار

هى : نون لّيّا فوق العام نتبّع فيه

خاء : ما رينا حتّى نتيجة

هى : منين تعرف

خاء : خويا وعائش معاه في الدار  
من اللّي عرفك  
درولتيه  
لا خليت طبة تلهي بيه  
ولا عايلته تحكم فيه

يقرّنها

قبليه وانسيه  
هي : نون عدّي العشرين  
ومسؤول على روجه

يكتب عليها

خاء : يا مدام  
حشيتي إيديك في غار  
ردّي بالك لا اللّفاعي تلسّعك

يخرج  
ساء تقدّم لها

ساء : توصليني في ثنيتك  
هي : ما نخدموش فرد بقعه  
الأم : لوين  
ساء : تي نقرا ممّا  
الأم : عبد الله سكول كي العادة  
ما تنسيش ستيلواتك وكراريسك

ساء تغيب  
الأم تخرج

جيم : اليوم وراس أمك ماني مفلتتك

جيم يجري خالط عليها  
يخرج وراها  
يغيب

# مهبول أنا

موسيقى  
تطلع الرّيدوات  
من الذّار للشنتط  
يظهر نون  
مغطّي راسه  
الطقس تبذل  
هي تلفّ روحها  
وتمشي له  
تقرّب له

هي : متغشّش

متغشّش على خاطر ما جيتكش الصّبّاح  
وإلاّ على خاطر تعاركت مع خوك


نون ما يجاوبهاش  
تزيد تقرّب له

نون ما إنجمش نطوّل معاك  
برّد  
ونكره حسّ الغربان  
ولون البحر كيف يتخلّط مع السّماء

نون ساكت

نون عييت  
من السّبعة خرجت من داري  
لتوة ما رجعت  
نحبّ نروّح نعمل بانو  
ونمدّ سويقاتي

ما يجاوبهاش  
تمشي وترجع له مفرّسة



علاش عيَظت لي  
نون مانيش على ذمتك

تَقَدِّمَ لَهُ  
يشير للسماء

نون : ريت الطيارات الحربية اللولبية  
تُعَسَّ عليك وعليّ  
هي : وانا النهار راح عليّ  
أعمل لي تاليفون  
ناخذو موعد آخر

وتدور

نون : تروّح نرمي روعي في البحر

ينزع حوايجه  
ترجع له  
تحاول تلبسه  
يلبس  
ويعاود ينزع

هي : إلبس  
برد عليك ماكش صغير  
يزيّ من الدلول

نون : هاني نلبس

هي : اليوم عملت عركة على خاطرك  
يحبّو يفكّولي الدوسي متاعك  
كان تحبّني نعاونك  
عاوتّي  
علاش عيَظت لي

إلبس

إلبس

نون : هاني نلبس

ينزع

هى : ما تحبّش تحكي موش لازم  
موش كلّ ما تفرّلي نجيك نجري

تمشي  
يزفر لها  
تأقف

نون : أقعد  
قلت لك نحبّ نحكي معاك  
هانى نلبس  
هى : إزرب روحك  
نون : مهبول أنا  
هى : كان ثمة حدّ مهبول هنا هو أنا  
نون : مهبول أنا  
هى : على هذا عيطت لي  
نون : مهبول أنا  
جاوبني  
هى : ما نعرفش  
نون : مهبول أنا  
هى : علاش تقول هكّة  
نون : الصّوت اللّي فيّ صوت شكون  
هى : إنت اللّي تسمع فيه  
نون : هانى نلبس  
قول لي صوت شكون  
هى : يفكّرك في حدّ  
نون : يفكّرني  
هى : أنثى  
نون : لا  
هى : ذكر

نون : لا

هي : كبير

صغير

نون : يمكن

هي : مَيّت

نون : لا

هي : حيّ

نون : مَيّت حيّ

هي : من العايلة

نون : نسيت

تقرّبله

هي : حدّ كان يجبرك

تعمل حاجات تكره تعمل...

يسدّ لها فمّها

نون : يفكّرني

هي : في شكون

نون : صوت بابا

يترتّد

بيكي

صوت بابا

يمشي

وينزع

صوت بابا

هنا فيّ

يضرب رأسه

بابا مات

بدنّه فنى

أمّا هو سكن هنا



حي  
حيّ فيّ

بيكي

كيف كنت صغير  
يقول لي  
أعمل هذا في مصلحتك  
وهذا في مصلحتك زادة  
ويني مصلحتي  
الكلهم يقولو في مصلحتك  
في مصلحتك  
وهوما ما يخمّمو كان في مصلحتهم  
يدّ تمسّح  
ويدّ مخيّبة عصا  
الكلهم كيف كيف  
البو  
الخو  
الطيب  
الفرملي  
النّاس في الشّارع  
في الجامع  
في الشط  
الكلهم يحبّو يحكمو  
يسيطرو عليك

تلمّ له حوايجو  
وتمشي له  
يطروشها

شكونهم باش يقرّرو  
آش يلزمك تعمل  
آش يلزمك تقول  
آش يلزمك تكون  
وأنا وين

انا شكون  
أنا سنوّة  
ما في بالهمش نقرأ في قلوبهم  
كايني في وسطهم  
نرى ونسمع فيهم  
يلزمني نستعرف بيهم  
باش نقبلهم  
ما ثمة سلّطة كان سلّطة الحقّ  
موش سلّطة الباطل  
القَمْع  
القوّة  
الطّغيان  
الخوف

يبزق  
يبزق ويعاود يتخمر

خَمَج  
الدّنيا الكلّ خامجة  
ما ثمة كان القوّة تجيب  
فهتم الدّرس

هي تخلط عليه  
وهو يبعد

النّهار راح عليك  
بنتك تستنى

هي : بنتي

نون : موش مسافرة غدوة

خايفة عليها

أول مرّة تسافر وحّدها

هي : شكون قال لك

نون : حدّ

نعرف

نرى اللي تعمى عليه  
ونفيق باللي تخبي فيه  
يلزمك تكون مهبولة كيفي  
باش تشوف اللي نشوف  
وتحسّ اللي نحسّ  
أشهرة

نرى في حيط صخر  
سادد عليّ النظر  
واليوم تحلّ  
ونور منه هلّ  
وأنا خايف  
مرة نقول نزدم نفلّ  
ومرة نقول تربص يا طفّل  
خايف

قبي تحلّ  
يقلب فيه موج البحر  
الخوآف يترمي  
ينتحر

والعوآم يخرج منه مُنْصِر  
وأنا حاير

واقف ورأسي في يديّ  
قول لي آش يلزمني نعمل  
آش انجمّ نعمل  
نرجع لكرش أمي  
فات الفوت

باش نموت  
نموت بالشّعرة  
وهي السّبب  
الأمّ

نكرها  
توجعني الأمّ

عمرها ما حبتني  
جابتني ولوحتني  
كرسي جامد في تركينة  
لا بوسة  
لا دحنيسة  
حدّ ما حبتني  
وحدّ ما يحبتني  
هذا اللّي مرضني

تقرب له

تلبسه

بيكي



ما صاب جيت إنت أمي  
ما صاب جيت إنت أمي

ينزرع حوايجيه بالغدره

برّة اذهب  
بنتك تستنى

يغطس في البحر

يغيب مع الموج

يخْلِيبها واقفة

الغصّة شادتها

تخلط الأم

تاقف جنب الطّبيية

الأم : وینه

الطّبيية تشير بصبعها للبحر

هي : أهوكة

الأم : غطّس

وخلّيته

علاه

ما نجبّوش يدخل للبحر

خَطَر

هي : علاش

ما يعرفش يعوم

الأم : نايا ما نعرفش نعوم

هي : نقص من الخوف عليه

ماهوش صغير

الأم : عندي نا مازال غشّير

ومستبلي برواريه

هي : ما عنده شيء في رواريه

الأم : نا أمّه

نا اللي ضنيت ورّيت

تعرفيه خير مني

هي : وأنا عندي دوسيه

كان تحبّ تعاون ولدك

أسمعه

وأعطيه وذنك

الأم : ما يعرفش يعمل على روحه

هي : إنت ما تخليهش

خايفة عليه

وخاصة خايفة منه

ترميلها الحوايج

وتتوجّه للخروج

الأم : خايفة على بناتي منه

وخايفة عليه أكثر

خايفة عليه على خاطر

تولد بستتين

وعينيه مبرّقين

خايفة عليه على خاطر

نطق عمره شهرين

ومشى عمره خمسة سنين

خايفة عليه على خاطر

لا وعدة حاكت فيه

ولا وُلّيّ رضى عليه

خايفة عليه على خاطر

يعدّي الليالي فوق الشجر

والجمّع في غريق البحر

كيف ييكي بالنهارين

وكيف يسكت بالشهرين

تغلبها الشّهقة

لو كان جاء ليدي  
نحطّه في قفص  
نقلّع الشّجر  
نشيّح البحر  
نحبّس المطر  
نغيّب الشّمس  
ونظفّي القمر  
نبيّس الأرض  
نقطع الهواء  
ونفرّق السّماء

ظلام

# كونجى بجمعة

الطبيبة تدخل

تنزع منديلتها

ترشقها على الميكرو 1

وتمشي للميكرو 2

هى : غلطة مهنية

قالوها غلطة مهنية

غلطة مهنية

ثلاثة طبة دارو بيها

الصاحب والعدو والمترهز

تجاوزت حدود مهنتك

اتبع في مريض

خارج حيوط المؤسسة

في اماكن عمومية

من غير موافقة إدارية

ولا متابعة طبية

غلطة مهنية

خوذ كونجى

جمعة إرتاح فيها وخمم

نخمم

نخمم على سنة

على مستقبلك في المؤسسة

تهديد

لا تنبيه

قالت لهم علاش ما تقرأوش

حساب ظروفه العائلية



جاوبها الأوّل  
إذا نقرأو حساب الظّروف العائليّة  
يلزمننا مرشدة إجتماعيّة  
وراء كلّ مريض  
كان تحبّ تبدّل المهنة  
تفضّل  
وزادها الثّاني  
تصوّر الفوضى اللّي يولي عليها السّبيطار  
إذا كان نتلزّو نسمعو كلّ مريض  
يحكي على غصرتّه  
على خوفه من الأخرين  
من الموت  
على مشاكله العاطفيّة  
العائليّة  
الاجتماعيّة  
الجنسياسيّة  
الحمد لله اللّي الطّبّ جعل الدّواء  
باش يسكّك الهذيان  
توّة بفضل العلم وتطوّره  
المريض ينجم يتسبل على فرشه  
يرشق عينيه في السّقف  
ويغيب  
قالت لهم  
أنا مريض ما نجبوش يغيب  
نجه حيّ  
حيّ  
نطق الثّالث  
الصّاحب  
ردّ بالك من زلّات العمر

à ton âge les dérapages sont faciles

الطفل صغير وشباب  
وإنت مطلقّة ومكّهبة على الخمسين  
سكّنت  
وَحَرَّتْ  
قَدِّمْتُ

شَرَّعْتُ فِي طابِقِهَا  
وَحَاكَّتْهُ بِكَفِّ  
وَمَا حَقَّهَاش  
مَا حَقَّهَاش هَزَّتْ يَدَّهَا عَلَيْهِ  
حَقَّهَا سَخَطْتَهُ بِطَقَطُوقَةٍ

بِكُرْسِي  
بِالْقَفَّةِ شَهَائِدَ مَتَاعِهِ  
حَقَّهَا  
حَقَّهَا  
حَقَّهَا

تطلق

ترجع للميكرو 1  
تاخذ منديلتها  
وتشدّ روحها

المؤسسة مكثتها  
العائلة نافرتهها  
وهي ماهيش مسلّمة  
شادّة فيه مكبّشة  
موش بإيديها وساقها  
بمخالبها وسنيها

ترمي المنديلة على كتفها  
وتجي خارجه  
صوت نون يوقفها  
نون في يده الميكرو 1  
وهي تخطف الميكرو 2

# رجع لي دوسي

نون : ألو

هي : ألو

سكات

نون : ألو

هي : ألو نون

نون : وحدك في الدار

ريتك نهار السبت

في سيدي بوسعيد

تشرّب في كاس تاي

معاك واحد مشلغم

هي : أنا زادة ريتك مع أصحابك

تتكيف في شيشة

ما في باليش بيك تشيش

نون : برشا شيء ما تعرفوش عليّ

هي : علاش ما سلّمتمش عليّ

نون : ما سخايلتكش عقلنتي

شكون اللّي معاك

يكون منك

هي : علاه تحبّ تعرف

نون : مريض هو زادة

طيب

هي : عنده هياة طيب

نون يتكلم

ويخزر ليده

كانها مستقلة عليه

نون : عنده شلاغم  
نكره الشّلاغم  
هي : منين تكلم فيّ  
نون : وحدك في الدّار  
هي : علاش تحبّ تعرف  
نون : تخاف منّي  
هي : علاش نخاف  
نون : عمرك ما خفت منّي  
هي : حقّني  
نون : كنت إنّجم نقلك  
هي : وقتاه  
نون : مرّة جيتك  
مخبيّ موسى  
حبّيت نقضي عليك وعليّ  
ما نجمّتش  
هي : علاه  
نون : ما زال وقتك  
أولادك لاباس  
هي : علاش تسأل  
نون : ما همش ناقصين فلوس  
المأندا تخلط في الوقت  
ما يحبّوش تسكرة طيّارة

اليّد تهيج  
كأينيّ تحبّ تضرب

باش يطلّو على ماما  
يوسوها  
يرقدو في شونها  
يشمّو ريحتها

نِكْرَه العايلة  
والسّعادة  
والطمأنينة  
والهناء  
والإنسجام  
والمودّة  
والإنشراح  
والمواسم  
والأعياد  
والأفراح  
والمسرّات  
وخاصّة العودة المدرسيّة

هي : تاخذ في دواك نون

نون : وإنت

صاحبك الجديد مشيخك

هي : وإنت

وقتاه تعمل صاحبة

نون : أنا نحبّ صاحب

راجل فحل

موش قلت لك نكره النّساء

ما حكيتلكش على صاحبي

الصياد

هاو رمّاتنه

ولدك في باله

هي : باش

نون : بعشقتك الجديدة

هي : شكون قال لك عندي عشقة جديدة

نون : قدّمتهم لبعضهم

وإلا ما زلت  
ما غارش  
ما حاولش يهرّسه  
وإلا ترى فيه بالسّرقة  
كي الفروخ  
أنا في بقعته نفرّيه  
هي : علاش كلّمتني نون

يسكت  
صوته يتبدّل

نون : رجّعني للسّيطار  
هي : تابع  
نون : تابع برشا  
نحسّ في روعي عريان  
النّاس تقرّأ في مخي  
توحّشت حيوط السّيطار  
وعبد الله صاحبي

هي تقرب لجيهته  
يقدم لها  
اليّد تهيج

هي : قول لي منين تكلم فيّ  
نجي نهزّك للسّيطار  
تاخذ دواك  
وترتاح

نون : تحبّ تتخلّص منّي  
ترميني في السّيطار وترتاح  
آش ريت منه أنا السّيطار متاعك  
كان التّمزييل  
والإهانة

اليّد تفود فيه  
هاربة عليه

والتنوفيق  
وإنت أكبر منافقة  
ما حاجتي لا بيك  
لا ييهم  
تذمّ لي فيهم  
وتخدم معاهم  
تشكى منهم  
وتدافع عليهم  
نون يفسّخك  
ويفسّخهم

نون يقرب لجبهتها  
ياقفو مقابلين بعضهم

هي : ما تنجّمش تفسّخهم  
تستحقّ لهم  
وتستحقّ لي

اليذّ تحبّ تشدّ  
تضرب  
تخفق

نون : ما نستحقّ لحدّ  
رجّع لي دوسي  
وكلّ ما كتبتّه عليّ  
نحبّ نحرقه  
ما نحبّ نخلّي  
حتّى أئر يربطني بيك  
ما كانش نزدّم عليك في الدّار  
انتيك  
تسخايلني ما فقتش بيك  
خدرتني  
نطقنتني  
قولتني في شيء

عمري ما حبيت نقوله  
آش باش تعمل بيّ  
وباللي حكيتهاو لك  
كتاب  
فيلم  
وإلا مسرحية  
عندك 28 ساعة في يدك  
تجيب لي دوسي  
ماكانش

يسكت  
مهلة طويلة  
هي : ألو ألو

الطبيبة توخر  
تغيب  
نون يرجع  
اليد تهيج  
الأم تدخل  
تقرب له  
بكاس ماء والدواء  
اليد تنتطر  
تضربه بالكف  
يمسح عليها  
يحاول يريضاها  
شيء  
تدور على الأم  
تتطر الدواء  
وتتصرف على رقبتهها  
تخفقها وتنزل  
تزدم العايلة  
تخوض  
نون يخنق في أمه



صِيحَاحٌ وَعِيَاطٌ  
يَسْلُوها مِنْهُ بِالسَّيْفِ  
نُونٌ يَهْرَبُ  
جِيمٌ وَوَاوٌ يَخْلُطُو عَلَيْهِ  
خَاءٌ يَدَادِي بَأَمِّهِ  
يَخْرَجُها  
سَكَاتٌ طَوِيلٌ  
سَاءٌ وَاُوٌ جِيمٌ وَقَافٌ  
يَخْرُزُّو لِبَعْضِهِمْ  
تَدْخُلُ الطَّبِيبِيَّةُ تَخْزُلُهُمْ  
يَقْحَرُوها  
تَقَدِّمُ  
يُوخِّرُو  
يَهْبِطُ الرِّيدُو الأَحْمَرُ  
عَلَيْهِمْ

# الاستقالة

هي تاقف قدام الميكرو 1

هي : بعد خنقة الأم

هزوها للسبيطار

وترماو على نون هرّسوه

حلّو الباب ولوحوه

ثلاثة أيام هايم في الشوارع

النهار الرابع

دز باب السبيطار

قال لهم

اسعفوني

يذي هاربة عليّ

تقود فيّ

قالو له كذاب

إذهب للأثنى اللّي لاهية بيك

تداويك

قال لهم وحقّي في الدّواء

قالو له ما عندك حتى حقّ لها

لحلّح

شكى

بكي

هبط له طيب جديد

قال له لا

هانه

شتمه

بالزّوفري

بالممسّخ

بالهامل

بالقُعر

بالممتن

بالمأكرو

نِعْتُهُ

نون خاض

صاح

هدد وتوعد

زدمو عليه

بركوه

كتفوه

غيزوه

وذوزة نور أعطاه

وعيطولها

نفس الطببة تلمو بيها

الصاحب العدو والمترهز

قالوا لها

الإدارة سحبت لك ملف المريض نون

وتهمتك بمسؤولية عصيانه للطبيب

وتمرده على المؤسسة

نفختهم وخرجت

دخلت لبيروها

حرودت لهم إستقالتها

ولوحتها لهم على خليقتهم

# تحيتك

نون يدخل

يمد للطبيبة باكو نوار

هي : ليا

بأنا مناسبة

نون : عيد ميلاد

هي : عيد ميلادي أنا

نون : عيد ميلادنا

هي : باقي مغروم بالبلاستيك

نون : بلا شك

ويدوم الدهر

ما تبوسنيش

تتردد

تمشي تبوسه

يخطف لها يدها بالصدره

يخضعضها

نون : علاش ما تحبنيش

كيما أنا نجبك

ما انجمش نقعد نعشق فيك

إذا تحمقني

يوكوك

يدخل بعضه

تحرقني

تحقرني

يلزمك تحبني كيما أنا نجبك

هي : نون  
أنا الطَّيِّبَة متاعك  
موش صاحبك  
نون : إيه عاد شبيهه



هي تفارع  
تحبّ تملص يدها  
يشدها ما بيسيها

مناش خايقة  
من عمرك  
ما يهمني  
اللي يهمني إنك تحبني  
كيما نجبك  
إنت وحدك  
أولادك كبرو ومشاو  
وأنا وحدي  
حدّ ما هو ناشد عليّ  
حبي كيما نجبك

هي : تسييني نون

نون : وإلا مانيش قدّ المَقَام  
رُدّ بالك

هذه آخر فرصة نعطيها لك  
مانعاودش

هي : نون وجعتني سييني

إذا تحبنا نعدّيو الحصّة

نحكيو في موضوع الحبّ  
نحكيو

نون : حصّة

موضوع

أنا موضوع

أنا نقول لها نجبّك

وهي تقول لي موضوع

أش تسخايل روحك

قدّ أمّي راك

خزرت لروحك

وخزرت لي مليح

عزوزة راك

عزوزة وتدلّل

على فرخ Beau gosse كيفي

يجيك نهار وتندم

تندم على اللّي عملته فيّ الكلّ

فاسدة

يسّيها وييعد

ما تحبّش تحبّني أنا وحدي

تحبّ الرجال الكلّ

فاسدة كيف الآخرين

رجّعلي دوسيّاً

كلّ ما كتبته عليّ

تسخايليني نسيت  
ما ننسى شيء  
شيء ما ننسى

يضرب رأسه

أفجرة مرصفة هوني  
دوسيات  
نخرجهم وقت اللّي يظهر لي  
انساني  
فسخني من ذاكرتك  
وإذا نهار قالوك  
نون انتحر  
قول لهم شكون نون  
نحبّ نموت  
عندي الحقّ وإلاّ لا

هي : حياتك وإنّ حُرّ فيها

نون : إمّاله علاه ضيّعت لي وقتي

علاه تلهيت بيّ

علاه ما خلّيتنيش

نوفى الحكاية من وين

هي : نخدم في خدمتي

نون : خدمتك

مالاّ خدمة

ما لقيتش حاجة أخرى

توكلك الخبز

هي : اخترتها ونحبّها

نون : شنيّة اللّي تحبّها

يمشي للميكرو 1

يخطفه

ويدور للقاعة

نقدّم لكم  
الذيّناصورة الأّخسيرة  
آآر كعبة في الدّفاع على الإنسانّيّة  
وحقوق البشريّة  
ومقاومة العنصريّة  
والحيوانات المنسيّة  
والزبدة المرحيّة  
بارك الله فيك  
على مشاعرك النّبيلة  
أحاسيسك المتدفّقة  
وأفعالك النّبيلة  
ما أقوى أعصابك  
وما أوسع بالك  
نشكروك على أعمالك الفاضلة  
وخدماتك الجليّة

يتقلب من جديد

يلزمك تحبّني كيما نحبّك

هي : كيفاش تحبّني نون

يخرّج ورقة من مكتوبه

يرميها لها

يفكّ نوارّه ويخرج

هي تحلّ الورقه

تقرأ

" عشت وشفت

حبّيت وتكويت

وكيف حبّك عمري ما ريت

العاشق يقول حبّك هبلني

وليك نقول حبّك عقّلني

حبّك أحياني وفجرني

رجّعت النور لعينيّا



ولعقلي حليت ثنية  
بعذت قلبي المجروح على الوحداية  
ولعقلي رجعت عينيا  
عمري فيك  
فمي ملكون  
عقلي صباح  
عقلي حرايش  
خطوة ليك  
نجبتك حبني  
اقبلني عبديك  
كلّ حسّ نردّ هولك نغمة  
كلّ خطوة تصبح لك رقصة  
كلّ عبسة توصل لك بسمة  
كلّ ربح نذريّ لك عشرة  
حبني  
كلّ فجر  
نهدي لك خيوط الشمس وذفاها  
كلّ ليل  
نحكي لك على ضوء القمره وعزاها  
نطلع  
ونقطف لك النجوم من سماها  
حبني  
حقيقتي بيك نراها

تظهر يد نون  
وراء الرّيدو  
يلوح لها النّوار  
ويغيب  
ظلام

# الأم

الزيدوا 1 و2 يطلعوا  
الأم باركة على كرسي  
جثة بلا روح  
أولادها واقفين وراها

هي : بعد شهرين  
الأم توفات

مهلة

الأم الحنينة  
الأم المسكينة  
الأم السكينة  
الأم  
بزولة شايحة  
وعين طافية  
الأم  
فم ما يعبرش  
وصوت ما يوصلش

واو : الأم

أمي  
أمك  
أم الكل  
أمي الحادة  
أمي القاطعة  
أمي الناهية  
اللاهية  
الباهية  
الساهية

الحاسمة  
القاتمة  
الصّامتة  
الصّامدة  
الأمّ  
الأمّ إرادة ما تحفّاش  
قوّة  
ما تتحكّاش

ساء : الأمّ

أمّ العاصي  
أمّ الهامل  
أمّ الزّاني  
أمّ الفاسد  
أمّ الفاسق  
أمّ الشّارد  
أمّ الخامد  
أمّ السّاجد  
أمّ اللّي فايق بالعلّة  
وخارج من الملة  
أمّ اللّي نحاوله أمّه  
أمّ اللّي مصوله دمّه  
أمّ اللّي شربوله عرقه  
ووسّخوله عرضه  
أمّ اللّي كتّفوله يده  
ولجمّوله فمه  
الأمّ

هي : أمّي

أمّك

أمّ الكلّ  
الأمّ الحنينة  
الأمّ المسكينة  
الأمّ السكينة  
الأمّ  
قصة ما تتحكاش  
أسطورة ما توفاش  
حلم  
حلم ما يتنساش

ظلام  
الريذوات 1 و 2 يهبطو

# السبّيطار من جديد

نون يتدهشر هايم  
جثة بلا روح  
في جرتة جيم وواو  
صوت الطّبيبة يتسمع من بعيد

Haldold هي :

Nozinan

Tranxène

كلّ ما يحدّر

ويبرّك

السبّيطار من جديد

صالة كبيرة

أصحنه بلاستيك مبعثرة

بقية مأكلة مبزّعة

قعامر سواقر منشّرة

ريحة مقرونة قارصة

ومرضى صغار وكبار

واقفين

قاعدين

متكّين

يمشيو ويجيو

يجعجعو

يغنيو

يحكيو

يزغرطو

وإلا ساكتين

غايين

المدرّوش

البهلول  
المهبول  
المسكون  
المُحَبَط  
الكلّ مخلّطين  
ونون في وسطهم  
يتدهشر  
العين غايية  
اللّسان مُلْكُون  
كُشَاكِش من فمّه فايضة  
الطّيب قال لها ممنوع  
ممنوع تقبله  
ما عادش تخدم عندنا  
ممنوع تزوره  
علاقتك بيه تسيء لصحّته الذهنيّة  
وتأثّر على حالته المرضيّة  
سكتت عليه  
كركرت نون للجنينة  
وتفاجات بيه

# الموت

يطلع الرّيدو 1

نون والطّبيبة قاعدين على القعة

نون في يده شوليفة يخيّط

جيم وواو

يتفرّجو من بعيد

هي : تخيّط

نون : نلمّ

هي : فاش

نون : في أشطاري



هي : تحسّ في روحك خير

نون : حبيّتك

حبيّتك قدّ ما حبيّت بابا

وكرهتك قدّ ما كرهته

في وقت من الأوقات

تصاوركم تخلطو في مخي

توة نقرتها

منعتني

رجعتني للدنيا

من غير ما حد جبرك

اليوم قررت

نحب نعيش واقف

وإذا عثرت وطخت

نعاول نقوم

هذه الدنيا

لعبة

الموت

موت بابا توة قبلتها

توة دخلت لمخي

بابا مات

مات

تدفن

ما عادش باش يرجع لي

ما عادش باش نراه

نهارة اللي مات

تقسمت في زوز

بدني في شيرة

وعقلي في شيرة

سارح في بحور حد ما يوصل لها

يحب يرجع الميت للدنيا

نهار

بت في الجبانة

مع بابا

تمديت فوق القبر



وبكيت  
بكيت حتىّ نشفت عيني  
وصرخت حتىّ بحّ صوتي  
فزعو الأموات  
وقفولي  
صُحّت فيهم  
غيبو  
غيبو  
قيلوني  
لا جبابنكم تحفلني  
ولا عباثكم تهرّبني  
لو كان جاء جهدي جهد  
نغرس مخاليبي في التراب  
نخرّج الأعقاب  
نفرش الأعظام  
ونقول له  
أخرج مني  
أعتقني  
سكنتني  
عبدتني  
هرّستني  
كسّرتني  
حيّ تتكلّم فيّ  
ميّت تتنفّس بيّ  
بعّدتني على الدنّيا  
وكرّهتني في عبادها  
خلّيتني ببوشة فارغة  
كلّ ما نطلّ في وسطها  
نرى فيها عينك

تخزّرلي  
لو كان تُلْظَمُ الأَعْظَامُ  
لو كان جاء اللّحم يدوم  
ولا يأكله دود  
كنت نخرّجتك من قبرك  
وغرست فيك سكينه

ياخذ من يدها الميكرو  
وياقف

هذه مرضتي  
هذه غصرتي  
هذه قهرتي  
موش هكّة  
إنّتم فهمت من الأوّل  
وما قلت لي شيء  
حبّيتني نوصّل وحدي  
ما كانش مرضتي ما كنتش نقبلها  
حدّ ما يحبّ يرى الحقيقة  
النّاس الكلّ تخاف من نفس الشّيء  
أمّا كلّ واحد يحاول يلعب  
يخبّي  
وإلا يعيش بخوفه  
وما تقول ليش الخوف مناش  
من الموت

يخرج

## هي تقدّم

هي : شتاء آخر خلط عليهم  
ونون غاطس في ماضيه  
يفرّت ويحلّل  
ساعات يخوض  
يهذد ويتوعّد  
ناقم  
ناقم على بوه  
اللّي كسّره ولوّحه  
ناقم على خوه  
اللّي مهيمن عليه  
ناقم على أمّه  
اللّي لا عرفت تحذيه  
ولا تحنّ عليه  
ناقم على البلاد اللّي مسلّمة فيه  
ناقم على الفقر اللّي مهمّله  
ناقم على الجهل اللّي مكثّفه  
ناقم على المرض اللّي مهتّكه  
وساعات يريض  
يحلّل ويسرح  
خالط وراء حرف  
حرف يهزّ للكلمة  
كلمة توصلّ لجملة  
جملة تأدّي معنى  
أشهرة مدّ وجزر  
باش يرجع نون لذاته

يقبل حاضره  
ويتغلب على واقعه

يطلعو الريدوات الكل  
كراسي مصففة  
الشخصيات الكاهم قاعدين  
موسيقى  
هي تخرج

١١  
١٢  
١٣

# أش تحبّ تكون

يُسمع صوتها من البرّه

هي : "ليس بالهزل ولا بالجهل خوض الكلمات  
فصدور الناس قد كانت قبور الكلمات  
يستجيرون بها منها... وأين الكلمات  
قل لمن همهم في الناس وخاف الكلمات  
إنما أنت شفاه ظمئت للكلمات  
ونداء حائر في الصّوت بحّ الكلمات  
آدك الصّمت فهلاً قلت بعض الكلمات  
فتكلّم وتألّم ولتمت في الكلمات"

العابلة تبدأ تتحرك

يدّ تسكّر في فمّ

الأخرى في وذنين

والثالثة في عينين

بدن يتهزّ ويتحطّ

ساقين ترعش

الكراسي تتحرك

والأبدان تتخمّر

ريدوات تهبط للقة

الطبيبة تتعارض مع نون

تلفزه في يده

ما هوش عارف وين بقعتها

وموسيقى غامتهم الكلّ

هي ترجع الميكرو 1 و 3

وتكرّر نون قدامهم

هي : نون إذا كنت شجرة

أمّا شجرة تحبّ تكون

نون : نخلة ناطحة السّماء

هي : إذا كنت هائشة  
أما هائشة تحبّ تكون  
نون : فرس عربي مقطعة اللحم  
هي : إذا كنت شكّل  
أما شكّل تحبّ تكون  
نون : كورة طائرة في السماء  
هي : إذا كنت عدد  
أما عدد تحبّ تكون  
نون : واحد لا يتقسم ولا يتعدّد  
هي : إذا كنت لون  
أما لون تحبّ تكون  
نون : لون البحر  
أزرق غارق  
هي : إذا كنت بحر  
أما بحر تحبّ تكون  
نون : هايجّ هايجّ  
يقليب ويغمّ  
هي : إذا كنت أرض  
أما أرض تحبّ تكون  
نون : صحراء مائة  
وأجبال عالية  
هي : وإذا كنت ربح  
نون : ربح شراقي رابحة  
هي : وإذا كنت ماء  
نون : نابعة سيّالة  
هي : وإذا كنت مطر  
نون : عايمة نافعة

هى : وإذا كنت صخر  
نون : أكحل يرحم  
هى : وإذا كنت بو  
نون : يشع ويرحم  
هى : وإذا كنت حرف  
نون : لام  
صامد رافض  
هى : نون آش تحب تكون  
نون : حي  
حي  
حي  
نعيش ونفرخ

ظلام

قدم أول عرض لمسرحية "جنون" بمسرح مدينة  
تونس مساء الجمعة 2 فيفري 2001 على  
الساعة السابعة والنصف.





## إصدارات دار الجنوب للنشر

### سلسلة "ميون المعاصرة"

حنا مينه الياطر تقديم الرشيد الغزي	الطيب صالح موسم الهجرة إلى الشمال تقديم توفيق بكار	محمود المسعدي حدث أبو هريرة... قال تقديم توفيق بكار
عبد الرحمان منيف شرق المتوسط تقديم حسين الواد	البشير خريّف الدقلة في عراجينها تقديم الطيب صالح	محمود المسعدي السد تقديم توفيق بكار
علياء التابعي زهرة الصبار تقديم هشام الرفي	محمد المولحي حديث عيسى بن هشام تقديم محمود طرشونة	محمود درويش مختارات شعرية تقديم توفيق بكار
صنع الله إبراهيم اللجنة تقديم حسن الصادق الأسود	جبران خليل جبران النبي تقديم ثروت عكاشة	إميل حبيبي المتشائل تقديم توفيق بكار
أدونيس مختارات شعرية تقديم عبد الله صولة	عروسية النالوتي تماس تقديم يوسف الصديق	حسن نصر دار الباشا تقديم محمد القاضي
البشير خريف برق الليل تقديم فوزي الزمرلي	محمد البساطي صخب البحيرة تقديم توفيق بكار	محمد علي اليوسفي شمس القراميد تقديم فواد التكرلي

### سلسلة "مفاتيح"

عبد القادر المهيزي أعلام وآثار من التراث النحوي	الصادق قسومة النزعة الذهنية في رواية الشحاذ لنجيب محفوظ	حسين الواد مدخل إلى شعر المتنبي
حسين الواد البنية القصصية في رسالة الففران	جلال الدين سعيد معجم المصطلحات والشواهد الفلسفية	حسين الواد اللغة الشعر في ديوان أبي تمام
محمد محجوب هيدقر ومشكل الميتافيزيقا	عبد الفتاح ابراهم مدخل في الصوتيات	عبد السلام المسدي في آليات النقد الأدبي
الصادق قسومة طرائق تحليل القصة	فتحي المسكينى هيفل ونهاية الميتافيزيقا	مقداد عرفة منسية علم الكلام والفلسفة

## سلسلة "معالم الحدائثة"

على عبد الرازق الإسلام وأصول الحكم	ط. البكوش/ص. الماجري فى الكلمة	حسين الواد تدور على غير أسمائها
ع. المزغنى/س. اللغمانى مقالات فى الحدائثة والقانون	حياة عامو أصحاب محمد	فتحى بن سلامة تخييل الأصول
أنور لوقا أبو حيان التوحيدي وشهرزاد	خالد الوغلانى صورة الرحيل فى شعر المتبى	رجاء بن سلامة الموت وطقوسه

## سلسلة "لزوميات المقال"

سبينوزا رسالة فى إصلاح العقل	سبينوزا علم الأخلاق	بارمينيدس القصيد
سبينوزا كتاب السياسة	فولتير كنديد	جاك ديريدا صيدلية أفلاطون

## سلسلة المسرح الحي"

فاضل الجعايبى فاميليا	محمد إدريس إسماعيل باشا	توفيق الجبالى كلام الليل
أحمد حاذق العرف المسرح التونسى وعوائق التجاوز	Fadhel Jaïbi Les Amoureux du Café Désert	

## كتب فى غير السلسل

محمد الناصر النفزواي فارس وبيزنطة والجزيرة العربية	عبد السلام المسدي قضية البنيوية	م. الشرفى/ع. المزغنى أحكام الحقوق
فتحى انقزوّ هوسرل واستئناف الميتافيزيقا	وديع بن ابراهيم فى التعامل مع النص الأدبى	شفيقة الشعبونى من الموضوع إلى المقال الفلسفى
ادموند شارل رو رحالة كنت	محمود المستيري/صالح عطية أفغانستان: السياسة الغالبة والسلام المسلح	توفيق بكار شعريات عربية
حياة عامو إسلام التأسيس ببلاد المغرب	حسن حسنى عبد الوهاب خلاصة تاريخ تونس	حسين الغربى مع أدباء البكالوريا
-Anastasia Manstein Chirinsky La Dernière Escale	Ali Mezghani Lieux et non-lieu de l'identité	Jean Fontaine Propos sur les littératures tunisiennes



«...أشعر لأسباب غامضة لأعرفها، أن هذا المريض متفرد  
ومختلف، وأن شيئاً ما في داخله قابل للإنقاذ.  
شيء ميئوس منه يرفض الاستسلام.  
هذا الشعور القوي الطارئ، موسوم بخاتم حاجة  
عمياء، لها طعم التمرد والغیظ، طعم غامض للشعور  
بالظلم. هذا الشعور الذي أسميته بعد فترة طويلة  
«صعقة حب علاجية»

في ذلك الصباح وبشكل ملغز حدث شرح مضيء في  
الستائر الرمادية للجناح الطبي. ورفض مدهش لواقع  
الصحة العصبية المرء، ولحتمية المرض والاعتقال».

ناجية الزماني

يوميات خطاب فصامي